










S 154 Re's.

mv. 1850





S 154

in 1850

*ex libris Remondin*

D V  
MESPRI,  
DE LA COURT:

Et de la louange de la vie  
Rustique.

*À la Genève le 1783*

➤ Nouuellement traduit d'Hespa- ➤  
gnol en François.



*de la Ville de Genève*

Quide fut si gentil & si brusque  
A composer carnes latins que presque  
Son eust bien fait de ses vers une digne  
Tant il estoient d'une bonne accordance  
Brief il fut tel que phœbus & ces amuses  
Luy firent part d'un million de ruses  
Emers lesquels il estoit si espris  
Que neust pas seue & leust se entrepris  
A accommoder son inclination  
Pour greuer autre vacacion.  
Et usy depuis nen nest point nay dno tel  
Si que ses vers font son nom immortel.  
Mais sache neust si brane ou subtils  
Quest celle la dnn neel marconnee.  
Tellem nay & adroiet ala gre  
Que phœbus ny scauroit tromper que dire  
Diques ophens ne seent si bien Jouer  
Ny amphon quon les denest tant couer  
Que cestuy qui les noms & les efface  
Et dampson & dorpseus de t grace  
Lesquels tous deux si plains estoient de vie  
Luy cederont ou bien auroient enue.  
Donq adroiet par dno mot plus grande  
Marconnee est dict gnafi marconide  
2 945



A' TRESREVEREND,

& tresdigne Prelat, M. Guillau-  
me du Prat, Euesque de Cler-  
mont, Antoine Alai-

gre humble

Salut.



ONSEIGNEUR, CES  
iours passés estant retiré pour quel  
que temps au Villaige, & prenant  
le plaisir, & cōmodité des champs,  
ung myen amy m'enuoya les œuures en uulgaire  
Castillan, de Dom Ant. de Guevara Euesque de  
Mondouët, & Chronicqueur de l'Empereur: en-  
tre lesquelles trouuay grand plaisir, & proffit  
à la lecture du Liure intitulé Le mespris de la  
Court, & louange du Villaige, dirigé au Roy  
de Portugal: de sorte, que pour mieulx retenir  
les bonnes sentences, & erudition d'icelluy, j'em-  
ploiay uoluntiers quelque heures de l'apres-  
souppée à le mettre, & traduyre en Francoys.  
Ne pensant (quād tout est dict) que la traduction  
deust iamais bouger d'entre mes autres brouil-

A 2 larts.

larts. Mais estoit mon intention finale (apres l'a  
uoir communicuée à aulcuns de mes plus grāds  
amys, qui n'ont l'intelligence de la langue He-  
spaignole) la laisser en ung coing de chambre,  
seruir de uiande aux Rats. Et pource, que le pre  
mier exemplaire, estoit diuisé en plusieurs feuil-  
lets separés, & sans ordre, donnay charge à ung  
escripuaïn mon uoyſin, de le doubler, & mettre  
au net : lequel y besongna si mal à son debuoir,  
que avecq ce, que par ignorance ne sceut suyure  
l'original, pour gagner une piece d'argent, uen  
dit, ou bon luy sembla, des copies si mal agēsées,  
que i'eus regret d'y auoir consommé le temps,  
Tellement qu'a la fin meu de la persuasion, & im  
portune instance de M. Anne Regin uostre uicai  
re general, & Pierre Cistel uostre aduocat (mes  
grandsamys) ay mieulx aymé offrir aux yeulx de  
touts cest œuvre mal traduit, qu'endurer ces  
exemplaires corrompus, à ma confusion estre en  
tre mains de tel, qui par aduventure, n'a iugement  
de congnoistre, dont procede la faulte. Parquoy  
Monseigneur, sous la guide de uostre adueu,  
i'ay aduenturé le sort de ma renommée. Me con-  
fiant, que uostre seul nom souffrira à conuaincre  
la malice



TRANSLATEUR. 5

la malice de ceste calumnie, qui comme ennemye  
des lettres, & lettrés, ne cesse de retarder l'hon  
nesté essay de beaulcoup de bons esprits. Avec  
ce qu'il m'a semblé digne, que l'œuvre d'ung pru  
dent, & docte Euesque d'Espaigne, fust presen  
té en France à son semblable, ou superieur, en  
scauoir, & integrité de mœurs. loimēt aussi, que  
les graues sentences, enseignemēts de bien uiure,  
& saintés propos contenus en ce Liuret, meri  
tent estre uoués à uous, qui estes coustumier d'en  
user en telle continuation, que chascun a desia  
opinion, qu'estes enuoyé du Ciel, pour estre pro  
tecteur, & patron de toute affligée uertu. Donc  
ques (Seigneur le meilleur des bons) ie uous de  
die ce peu de labeur : non qu'il soit digne de  
uenir en uos mains, mais pour estre per  
petuel tesmoing, que uous doibs ser  
uice, & reuerence: à laquelle me  
recommende treshumblement.

De uostre cité de Clermōt,  
ce premier iour de May.

Mil cinq cents  
quarante, &  
deux,

A 3 AN

Au Lecteur.



**A**MY LECTEUR, j'ay  
vſé en la preſente traduction  
(cōme voyrras) de la plus grand'  
facilité, qu'il m'a eſté poſſible, de-  
ſirant affectueuſement, que chaſcun y profe-  
ſiſtaſt. Et ſ'il te ſemble, que ie n'aye obſerué  
ſi diligemment la loy, & propriété de bien  
traduyre, comme beaulcoup d'aultres, qui  
en font profeſſion, ie te prie entre aultres  
choſes penſer, que la phraſe du Caſtillan eſt  
trop plus copieuſe, que la Francoyſe, & la  
liayſon bien fort differente. Donc ſi prends  
meſcontentement en quelque periode mal  
ſonant, ou tronqué, ſcache, que ie me ſuis  
aſſeruy, iuſque à faire conſcience, de ne vou-  
loir rien perdre de l'intention de l'Auther.

Du meſpris

D V  
MESPRI  
DE LA COVRT:

Et de la louange de la vie

Rustique.

Qu'aucun Courtisan ne se peut  
plaindre, sinon de soy mesme.

Chapitre I.



PRES QUE LE  
Trefillustre Prince Philippe Ma-  
cedo eut uaincu les Atheniens, ad-  
uint ung soir à son soupper, qu'il  
se meut propos entre luy, & les  
Philosophes, qui estoient au tour de luy, sur la  
question, assauoir, qui estoit la plus grand'chose  
du monde, Vng de ces Philosophes dist, que la  
plus grand' chose du monde luy sembloit estre  
l'eau, pource qu'il y a plus d'elle seule, que de  
toutes les aultres choses ioinctes. Vng aultre

A 4 dist



dist, que la plus grand' chose du monde estoit le  
 Soleil, puis que sa seule lueur suffisoit à illuminer  
 le ciel, l'aër, la terre, & l'eau. Vng aultre dist,  
 que la plus grand' chose estoit le grand mont  
 Olympe, la haulteur duquel surmonte les nuées.  
 Vng aultre dist, que la plus grand' chose du mon-  
 de estoit le tres famé geant Athlas, sur le se-  
 pulchre duquel fut fondé l'espouuentable mon-  
 taigne d'Ethna. Vng aultre dist, que la plus  
 grand' chose estoit le grand poëte Homere, qui  
 fut en sa uie tant renommé, & apres sa mort  
 tant regretté, que sept grosses cités feirent entre  
 elles long temps la guerre pour auoir, pour sa-  
 cre relique, ses os. Le dernier, & plus saige Phi-  
 losophe, dist. Nil aliud in humanis rebus est ma-  
 gnum nisi animus magna despiciens. Voulant di-  
 re: Nulle chose en ce monde ne se peult appeller  
 grāde, si n'est le cueur, qui mesprise choses gran-  
 des. O haulte, & moult haulte sentence: puis que  
 par icelle nous est donné à entendre, qu'au faict  
 de richesses, & honneurs de ce monde, plus est  
 digne de gloire celluy, qui a esprit pour les me-  
 spriser, que celluy, qui a la hardiesse pour les gai-  
 gner. Tite Linc loue, & n'a iamais assez loué, le  
 bon

Homere

bon Consul M. Curius: à la maison duquel, estât  
uenuz ung iour les Ambassadeurs des Sannites,  
pour recouurer certaine terre, qu'il tenoit  
d'eulx, & à ce luy offrirent beaulcoup d'or, &  
d'argent, luy, qui d'adventure lors lauoit quelc-  
ques herbes pour mettre cuyre à sont pot, leur  
respondit ces propres parolles, Vous deussiez  
bien presenter cest argent à Capitaines, qui ne  
daignent, & se tiennent pour mesprisés de dres-  
ser leur pot, & viande, non pas à moy, qui ne  
demande plus grandes richesses, qu'estre Sei-  
gneur des Seigneurs d'elles. Quoy? ne meri-  
toit pas plus de louange ce M. Curius d'auoir  
mesprisé les talents d'or des Sannites, que le Con-  
sul Lucullus d'auoir desrobbé ceulx des Spartes?  
Ne meritoit pas plus de gloire le Saige Crates,  
pour les richesses, qu'il iccta dedans la mer, que  
le roy Nabuchodonosor pour les thresors, qu'il  
desroba du temple? A uostre aduis ne meritarent  
pas plus dhonneur les Isles Baleares, à ne consen-  
tir, qu'en elles eust or, ou argent, que les auares  
Grecs, à uenir prédre à force, & piller les mines  
d'Hespaigne? Ne fut pas plus grand le cueur du  
bon Empereur Auguste, à mespriser l'Empire,

M. Curius

Lucullus

Crates

que celluy de son oncle Iulius Cesar à l'occuper.  
Pour entreprendre ung bon affaire, il est besoing  
d'auoir prudence, experience pour l'ordonner,  
industrie pour le poursuyure, & fortune pour  
le mettre à fin. Mais pour le soustenir, & gar-  
der, il y fault grand effort: & pour le mespriser  
bon cuer: pource qu'on mesprise plus aysément  
ce, qu'on ueoit de l'œil, que ce, qu'on tient desia  
en ses mains. On a ueu à beaulcoup d'illustres  
hommes la fortune tant à soubhait, qu'ilz ont en-  
trepris, & sont paruenus à des choses presque  
impossibles: lesquelz toutesfoys par faulte d'es-  
prit despuis ne s'en pouuoient descharger. De  
quoy se peult entèdre, que la grãdesse de cuer,  
ne cōsiste pas tant à paruenir à ce, qu'on desire,  
comme à mespriser, & cōtemner ce, qu'on ayme  
le mieulx. Apollonius Thianeus mesprisa il pas  
sa propre patrie, & transuersa toute l'Asie,  
pour aller ueoir le Philosophe Hiarchas en In-  
de. Aristote mesprisa la priuaulté d'Alexandre,  
pour retourner lire la Philosophie à son Acade-  
mie. Nicodius n'estima rien le thresor, que le  
grand Roy Cyrus luy donnoit, pour le suyure à  
la guerre. Le Philosophe Anatillus mesprisa  
troys



troys fois la principaulté d'Athenes, disant,  
 qu'il aymoit myeulx estre seruiteur des bons,  
 que chastieur des mauuais. Cecilius Metellus  
 uaiillant Capitaine Romain ne uoulut oncq' acce-  
 pter l'estat de Dictateur, qu'on luy donnoit: ny  
 l'office de Consul, qu'on luy offroit: respondant,  
 qu'il uouloit manger en paix ce, que avec grand  
 traual auoit acquis à la guerre. L'empereur  
 Diocletian, comme est notoyre, renonça de son  
 franc uoloir à l'Empire, & non pour aultre rai-  
 son que pour se retirer du bruyt de la Republic-  
 que, & iour du repos de sa maison. Digne est de  
 louange celluy, qui a cuer pour mespriser ung  
 Empire, ou ung Royaulme: mais encores plus cel-  
 luy, qui mesprise soy mesmes, & ne se regist par  
 son propre aduis: pource, qu'il n'est homme en  
ce monde, qui ne soit plus amoureux de ce, qu'il  
desire, que de ce, qu'il a. Pour conuoyteux, &  
 ambitieux qu'ung homme soit, s'il traueille dix  
 iours pour ce, qu'il a, il en employera cent pour  
 euyder auoir ce, qu'il desire: a raison de ce, que  
 la peine ne se despart pas à ce, qu'on doibt, mais  
 seulement à ce, qu'on soubhaitte. Si nous chemi-  
 nons, si nous nous faschös, si ne pouuons dormir,  
 ce n'est

ce n'est mye pour neceſſité, mais pour ſatisfaire à la uolunté. Et qui pis eſt, non contents de ce, que pouuons, procurons de pouuoir ce, que deſirons. O combien en auons nous ueu es courts des princes, eſquelzeuſt eſté beſoing n'auoir eſte ſeigneurs de leur uoloir, & moins de leur deſir, pource, que deſpuis faiſants ce, qu'ilz pouuoyēt, & deſiroyēt, uindrent a faire ce, qu'ilz ne debuoyent. Si à l'homme, qui nous offeſce, fault demander pardon, demāde chaſcun à ſoy meſme pardon deuāt, qu'à tout aultre: ueu que à ma meſme perſonne ne m'a tant faiēt de mal, comme moy meſmes m'en ſuis procuré. Qui me faiēt cheoir en ſuperbe, ſi n'eſt ma ſeule preſumption, & ſottife? Qui oſeroit emprisonner mon triſte cuer d'enuie, ſi n'eſt faulte de naturel? Qui oſera enflammer en mes entrailles le feu d'ire, ſi n'eſt ma tresgrand' impatience? Qui eſt la cauſe, que ie ſuis en mon manger ſi deſordonne, ſinon que ie me ſuis nourry friand, & gourmād? Qui eſt cauſe, que ie n'ay pas deſparty de mes biens aux pauures neceſſiteux, ſi n'eſt l'exceſſiue amour, qu'ay à mon argent? Qui donne licence à ma chair de s'eſleuer contre mes ſaincts deſirs, ſi n'eſt mon cuer



cueur cōfist en plaisirs uoluptueux? De tous ces  
dommaiges, & notoires faultes, à qui en donnez  
uons la coulpe ò mon ame, si n'est à ma propre  
sensualité? Grand' follie est, estant le larron en  
nostre maison, le chercher dehors. Aussi est ce  
en nous manifeste faulte d'experience, quand uo-  
yons en nous la coulpe: en former à aultruy loc-  
casion. Par ainsi nous debuons tenir pour dict,  
que iamais n'acheuerons de nous plaindre, ius-  
ques à ce, que commencerons d'amender. O com-  
bien, & combien de foyz au cêtre de noz cueurs  
se combattent la uertu, qui nous oblige à estre  
bons: & la sensualité, qui nous inuite d'estre  
nains, & peruers. Duquel combat s'ensuyt ung  
iugement obfusqué, ung entendement pertur-  
bé, ung cueur alteré: & finablement nous mes-  
mes, de nous mesmes sommes fâschés. Le pöete  
Ouide racompte de l'amoureuse Philis la Rho-  
dienne, qui se plaignant de soy mesmes, disoit:  
Remigiumq; dedi, quo me fugiturus abires:

Heu patior te'is uulnera facta meis?

Comme s'il uouloit dire: O demophon, Si ie  
n'eusse employé temps à t'aymer, & argent, &  
nauires pour l'expedition de ton uoyage, tu  
n'eusses

n'eusses osé bonemēt t'en aller, ne moy me plaindre de ton despart: en sorte, que de mes propres armes furent mes entrailles frappées. Si nous croyons Iosephus, en ce, qu'il escript de Mariana, & Homere en ce, qu'il dist de Helene, Plutarque en ce, qu'il dist de Cleopatra. Virgille de la royne Dido, Theophraste de Policene, Xatippe de Camilla, Assenarius de Clodia: toutes ces dames, & excellentes Princeesses ne se trouuarent iamais si mal d'auoir esté deceues par leurs amoureux, comme d'auoir par leurs propres conseils, creu, et cōsenty de legier. Si à Suetone, Xatippe, & Plutarque dōnōs foy, en ce, qu'ilz narrēt de Pompée, Pyrrhus, & Hānibal, & du Cōsul Marius, du dictateur Cesar, de Marc Antoine, & plusieurs aultres, nous trouuerōs, qu'ilz ne blasmerent pas tant fortune d'estre par aultruy uaincus, cōme de s'estre regisen leurs prosperites par le conseil, & aduis d'eulx mesmes. Bien est uray, que aulcunesfoys l'opiniō de noz parēts, & amys nous met (en matiere de iugement, & aduis) hors des gons de raison, ne tachants, qu'à un fol auancement de biens, & richesses. Et à la par fin, quand par leurs admonitions on a entrepris quelque

quelque affaire d'importance, qui requiert ayde d'aulcun, ce sont les derniers, qui se monstrent amys secourable. Qui est l'occasion, qu'on ne se peult demettre des entreprinſes: si n'est sans honneur, & à desauantaige. Beaulcoup de gēs disent, qu'ilz ont des ennemys, & le comptent ſouuent ſans ſe trouuer du nōbre: cōbien, qu'il ſoit uray à bien calculer, qu'on n'aye le plus ſouuent plus grand ennemy, que ſoy meſmes. Et le plus grand dāgier, que ie uoy, eſt, que ſoubs ombre de profiter, & meilliorer moy meſmes, à moy meſmes ſuis cauſe de perdition. Le philoſophe Neotidas Neotidas une ſoys interroguē, lequel eſtoit le meilleur conſeil, qu'un gōme peult prēdre, reſpōdit, q̄ cōſeil d'aultruy avec meſpris du ſien propre: & rendit raiſō, pource, que la corruptelle des humains eſt telle, qu'on s'amuſe le plus ſouuēt à ſe chercher ſoy meſmes: et ne ſe peult ont trouuer à faulte de ſecours du bien, qui reſpoſe en la teſte d'aultruy. Dōt ſ'enſuyt, qu'au meilleur tēps de noſtre uie la uie meſmes nous deçoit, les mauł ſortēt de tous couſtēs, les pēſemēts nous prēnent, les amys nous laiſſent, perſecutiōs nous tourmentēt, faſcheriēs nous acheuent, & ambitiōs nous enſepueliſſent.

Si nous



# LE MESPRIS.

Si nous regardons ce, que sommes, de quoy sommes, & pourquoy nous sommes, trouuerons que nostre commencement est, oubly: nostre milieu, travail: la fin, douleur: & le tout ensemble, une manifeste erreur. Voyla, combien triste est le uiure (au Courtisan mesmement) & dangereux le chemin, ou il y a pierres pour trebuscher, boue pour se embourber, glaces pour cheoir, sentiers pour s'esgarer, ports à passer, larrôs à craindre: & tant de negoces à expedier, q'ua peine est il aucun, qui uoyse là, ou il ueult: & moins, qui arriue là, ou il desire. Toutes ces choses auons dictes, affin que les Courtisants entēdent, que moy, ny eulx, ne scauons choysir le bon, & laisser le mauuais, euitier ce, qui nous endommaige: & conseruer ce, qui nous proffitte: seruir la raison, & desemparer l'occasion.

Mais si bien nous uient de hazard, nous en mercions fortune: & si mal, nous en dōnons tout le tort à desaduention.  
ture.

Que nul ne doibt conseiller à aultruy, qu'il  
aille en Court: ou depuis, qu'il y est,  
qu'il s'en parte. Mais que cha-  
scun eslise l'estat, que  
mieulx il aymera.

Chapitre. I I.



Ristarque le grand Philosophe  
Thebâ, disoit: Quid optes, aut quid  
fugias, nescis: ita ludit tempus. Vou-  
lant dire, le temps, & l'homme, sont  
tant muables, qu'à peine sçauent les plus saiges  
choisir ce, qu'il leur est bõ: & se garder du mal.  
Et n'est rien plus uray: puis que uoyons chascun  
iour, qu'avec ce, que l'ung guerist, l'autre tombe  
malade: avec ce, que l'ung meilliore, l'autre em-  
pire: avec ce que l'ung est fauorisé, l'autre est de-  
botté, & finalement en ce, que l'ung uit con-  
tent, l'autre est presque desespéré. Le docte Al-  
chimus interrogué par son Mœcœnas le roy  
Demetrius, en quoy consiste principalement le  
plus grand trauail de ce monde, respõdit. Il n'est  
guere chose, ou il n'y ayt angouisse, ou soupçon:

B

mais

mais sur tout, le plus excessif travail, que l'homme puisse porter, est, de n'auoir en rien contentement. Et qu'il soit uray, si en aucune chose trouuons contentement, pour petite, qu'elle fust, en elle, & non ailleurs, serions nostre paradis, & uolupté, avec le repos de la uie: ce que toutesfoys aduient à bien peu de gens. Pource, que uiuans comme nous uiuons en mescontentement, uouldriôs bien essayer, & sçauoir, s'il faict bon estre Roy, ou prince, ou Cheualier, marié, ou Religieux, marchand, laboureur, pasteur, ou de quelcque aultre estat. Et à la parfin le tout esprouué, à peine trouuerions nous, ou nous arrester, tant est inconstante la legiereté des hommes. Si est ce, que le Saige se doibt determiner en ceste electiō au plus pres, qu'il peult de la mediocrité. Vng sot pusillanime se contente aysémēt de quelcque chose, que ce soit. Mais celluy, qui a bon cueur, pense, que si en l'estat petit est ennuyeuse la paureté: aussi est au grand estat, dangereuse la fortune. Platon fut en ses ieunes ans moult humain, & mondain, comme celluy, qui auoit beaulcoup ueu tāt aux guerres, que aux offices politiques, qu'il auoit exercés: & aultres arts mecaniques.

Vng



Vng iour interrogué, ou il auoit plus trouué de contentement, & repos, respondit. Il n'est estat, ou il n'y ayt muance: il n'est honneur, ou il n'y ayt peril: richesse, ou il n'y ayt travail: prosperité, qui ne s'acheue: ny aussi plaisir, q ne faille. Mais quand tout est dict, ie ne trouuay oncques tant de contentement, comme depuis, que laissay les negoces des cités, me retiray à la bonne compaignie de mes liures: signifiant, que tant, que uiuôs seruiteurs du monde, nous le desirons tout, nous l'essayons tout, nous le procurons tout: puis tout uen, & gousté, tous de tout nous ennuyôs, & fâschons. La plus grād' part de nostre mescōtentemēt uient de ce, que nostre beaulcoup, nous semble peu: & au cōtraire, le peu d'aultruy, nous semble beaulcoup. Nous disons, que nostre felicité est travail: & que le malheur d'aultruy est repos. Nous approuuons la façon de faire des aultres, & condamnons la nostre. Veillons pour trouuer une chose: puis soudain nous endormôs pour la perdre. Nous ymaginôs, que tous uiuēt cōtents: & q nous seulz sommes souffreteux. Et qui pis est, croyons ce, que songeons: & ne mettons point de foy à ce, que uoyons clairemēt.

Quel chemin on doit s'uyre, ou quel estat on doit choisir, nul ne le peult au uray scauoir, ny conseiller, pource qu'il est une si fastidieuse uariété, à qui n'a delicat iugement, qu'on y est le plus souuent deceu. Si le nauiger en mer est dangereux, aussi est l'aller sur terre fascheux. Au faict de la uie, on uoyt les sains en ung moment tomber malades, les malades mourir: les uns eschapper de mortel danger, les autres trainer long temps. Au faict de uoyager, & cheminer, aussi tost arrive au logis celluy, qui ua lentement comme celluy qui par ce trop hastier s'esgare. Au faict de faueur, plus a de support celluy, qui est en paresseux repos, que celluy qui sue de continuel travail. Donc ce peult cōclure, qu'il n'est chose au monde si certaine, cōme toutes choses estre incertaines. Or reduisant ce, que dict est, à nostre propos, disons que c'est temerité, de conseiller à aulcun, qu'il se marie, ou qu'il estudie ou qu'il aille à la guerre, ou qu'il prenne quelque aultre uacation: pource, qu'en ce cas nul ne se doit rendre propice à ce, qu'on luy dict: mais à ce, que sa naturelle inclination s'addonne, Plutarque en ses Liures de la Repub



Republicque, loue grandement le bon Philoso-  
phe Platon (Et nō sans cause: car en ce, qui s'en- *Plato*  
suiet, uoit de grand' prudence) de ce, qu'en son  
Academie n'entroit nul ieune hōme, que premie-  
remēt ne fust fondé, Et prouuē, s'il auoit l'incli-  
nation aux lettres: de sorte, que ceulx qui ne luy  
sembloyēt estre aptes à l'estude il les renuoyoit  
estre negociateurs à la Republicque. Alcibiades  
le Grec uous suffira pour tesmoing: lequel, bien  
qu'il fust meiné fort ieune à l'escolle d'ung tres-  
sçauant Precepteur, si est ce, qu'il fust naturelle-  
ment enclin aux armes, iusques à en faire profes-  
sion. A celluy, qui est nay pour porter l'espée  
au costé, mal siet une estolle au col. A qui ayme  
garder brebis, n'appartiēt estre en court. A cel-  
le, qui desire mary, est grād faix porter le uoile.  
Qui ayme à estre barbier, pourquoy le fera on  
painctre? Conseiller à nostre amy, qu'il prenne  
ung certain mestier, ou estat, pour uiure n'est  
que bien faict. Mais luy specifier necessairement,  
lequel il doit prendre, cela me semble reprouuē. *Pyrron*  
Ligur gus legislateur des Lacedemoniens, com-  
mandoit aux peres sur grands peines, de ne met-  
tre leurs enfans à mestier iusques à quatorze

ans passés, pour ueoir en l'aage de discretion, à quoy naturellement s'enclineroyent. Laissons ces circumlocutions, & disons ce, qu'en conseil-  
lons au Lecteur. Conseiller à aulcun, qu'il laisse la Court, & s'en aille au uillaige, ou qu'il laisse le uillaige pour aller en Court, tel conseil ne ueult conscience, que ie donne: ne saigesse d'autrui, qu'on le prenne à desauantage: ioinct, qu'il y a difference de ce, qu'on conseille à l'amy, à ce, qu'il doit faire. Toutesfoys ce, que mon opinion en sen, est, que le saige doit toutes disputes obmises, choisir tel estat, & demeurer en tel lieu, ou il puisse honnestement se substantier, uiure sans reproche, & mourir seurement. Beaulcoup de foys ung homme se remue d'une Prouince à aultre, d'une uille à aultre, d'une rue, d'une maison, d'une compaignie à aultre, reste en fin, que s'il auoit peine en une, il se plainct à oultrance de l'aultre. Et la raison est: pource, qu'il donne la coulpe à la condition de la Prouince, ou du lieu, qui neantmoins est toute en sa mauuaise nature. Que dirons nous d'auantage? Si non, que en Court, es cités, aux uillaiges, & ailleurs, ont uoit le uertueux estre  
correct,

correst, & discret: & au contraire, le uitieux,  
dissolu, & esuanté. Le uice, & le uitieux, cher=  
chent par tout le moyen d'empirer: & la uertu  
& uertueux de meilliorer, en quelque uacca=  
tion, qu'il soit appellé. Prenez l'Ecclesiastique.  
A l'Eglise n'a charge, tant dangereuse soitelle,  
qu'en icelle l'homme ne se puisse sauuer: ne tant  
legiere à la conscience, qu'il ne se puisse perdre.  
A comparaison de la rose sauluaige: de laquelle  
la mouche à miel faict le miel: & l'araigne la poi=  
son. Somme la bonne uolunté faict la bonne  
uacation: moyennant que l'homme luy fasse hon=  
neur, & non pas elle à l'homme. Le Prince peult  
faire son debuoir faisant iustice, & ne exerçant  
tyrannie: le gendarme allant à la guerre, & ne  
foulant le menu peuple: le religieux contemplant  
à son cloistre sans murmurer: le marié entrete=  
nant sa famille sans adultere: le riche donnant de  
ses biens pour Dieu sans usure: le laboureur  
trauillant: le pasteur gardât ses troupeaulx,  
sans faire dommaige à ses uoysins: & ainsi des  
aultres. Et qu'il soit uray, prouuôs le par l'escri=  
pture. En estat de Roy, Dauid fut bon, & Saul  
mauluais. En estat de prestres, Mathathias bõ, et



Obnias mauuais. Des prophetes, Daniel bon,  
& Balaã mauuais. Des pasteurs, Abel bon, &  
Abimelech mauuais. Des uesues, Iudith bonne,  
& Iezabel mauuaife. Des riches, Iob bon, &  
Nabal meschant. Des Apostres mesmes, saint  
Pierre bon, & Iudas reprouuë. Voila comment  
estre bon, ou meschant, ne prouient de l'estat,  
qu'on prend: mais de la mauuaife inclination. Si  
nous cōseillons à quelcun, qu'il uiue au uillaige:  
il dira, qu'il ne sçauroit hanter la compaignie  
des rustiques. Si on luy conseille qu'il laisse la  
Court: il dira y auoir mille affaires. Si on luy con  
seille, qu'il serue chés ung Prince: il dira, qu'il  
n'a nul entretien. Si nous sommes d'aduis, qu'il  
soit d'Eglise: il n'ayme leuer matin. Si marié, di  
ra, qu'il se fasche d'ouyr pleurer les petits en  
fants. Si religieux, la solitude luy est contraire.  
Si homme d'estude, la teste luy faict mal souuent.  
Si on luy conseille, qu'il se retire à sa maison: il  
ne peult uiure sans grand' compaignie. Presu  
posé ce, que dict est, nul ne doibt resolutement cō  
seller à aultry, l'estat, qu'il doibt ensuyure: mes  
memēt, quand concerne l'hōneur, & bien de la  
uie: pource qu'apres on uient à se plaindre, plus  
du

du conseil, qu'on a prins, que des maulx, qu'on en a souffers.

Que le Courtisan ne doibt laisser la Court,  
pour y estre sans faueur: mais à l'in-  
tention, qu'estant hors de là,  
il sera plus vera-  
tueux.

Chapitre III.

**P**vblus Mimus dit en ses annotatiōs:  
Deliberandum est diu, quod facien-  
dū est semel. Ceste sentence ueult di-  
re, que nous debuons penser beaul-  
coup de iours ce, qu'il fault faire en ung. Le  
Roy Demetrius filz d'Antigonus interroguē  
par ung sie Capitaine nōmé Patroclus, pourquoy  
il ne donoit la bataille à son ennemy Ptolomée,  
puis qu'il estoit le plus fort et de prud' hōmie, &  
de nōbre de gens: respondit. In quibus pœnitē-  
tia non habet locum, magno pondere attendē-  
dum est. Signifiant, qu'aux choses, que depuis,  
B s qu'elles

Agésilas

qu'elles sont faictes, on ne s'en peult repentir, il fault, deuant les commencer, long conseil, & pesante entreprinse. Agésilas prudent Capitaine des Licaoniens, pressé de respondre à certains Ambassadeurs des Thebains respondit. An nescitis, quod ad utilia deliberandum, mora est tutissima? Ne sçauex uous pas ó Thebains, qu'a deliberer d'une chose d'importance, il n'est rien meilleur, que le penser longuement? Plutarque à la uie de Sartorius le loue grandement, qu'il estoit tardif à deliberer, & graue à entreprendre. Suetone dict d'Auguste l'Empereur. Amicitias neq; facile admisit, & constantissimè reuit. Il n'estoit pas prompt à faire amys: mais constât à merueilles à les entretenir, quand les auoit. De ces exemples noterons le danger, auquel tombent les hastifz en leurs faicts: & uolontaires en leurs conseils. Nous ne uoulons uestir robbe, si elle n'est cousue: ny goustier fruit, s'il ne'st meur ny uin, s'il n'est clair: ny chair sans cuire: ny chauffer avec boys, s'il n'est sec. Pourquoy nous conseillons nous donc à conseils uerds, avec lesquelz nous fumerons plus tost, que ne nous chaufferons? L'homme saige doit tousiours proposer



proposer deuant ses yeulx une meure delibera-  
tion à ses affaires. Et s'il pense une heure ce,  
qu'il doibt dire: il en deburoit penser dix à ce,  
qu'il doibt faire. Les parolles sont parolles, &  
les peult on corriger, & retracter: mais à peine  
iamais le faict inconsideré. La faulte prouient,  
que chascun s'estudie à parler, disputer, iuger,  
& nul à bien uiure: & consequemment à uertu-  
eusement mourir. Les graues, qui ueulent con-  
seruer leur autorité, fault qu'il se gardent d'es-  
stre testus, ou brusques en ce, qu'ilz entrepren-  
nent: & muables en ce, qu'ilz font. Car une  
des plus grandz faultes, que l'homme puisse au-  
oir, est, d'estre trouué menteur en son dire:  
& inconstant à ce, qu'il a commencé. Vng gen-  
til cueur doibt regarder au loing ce, dont il se  
charge: & si c'est chose iuste, & raisonnable,  
plus tost mourir, que reculler: monstrant que  
aux bons affaires se congnoissent les cueurs  
uiriles. Si n'eust esté chose difficile, & quasi  
impossible à Achilles de tuer Hector: à Agesti-  
laus, de uaincre Brantes: à Alexandre. Dar-  
rius: à Cesar, Pompée: à Auguste, Marc  
Antoine: à Scilla, Mithridates: à Scipion,  
Hann

Hannibal: & au bon Train, Dacebalus, iamais ces tant illustres Princes n'eussent esté renommés, comme ilz sont. Le bon aduis dōc, & le bon cueur, en choses grandes, doibt gouverner les entreprinſes. A nostre propos, Monsieurs le Courtisan entreprēdra à laisser ceste mauldicte Court & aller mourir à sa maison, disant, que sa uie en tel trouble, est une mort continuelle. O à cōbien ayie ouy dire ces belles parolles, qui n'en ont rien faict, s'excusants à la seule destinée de la Court, qui les tient englués: Quād le Courtisan n'a plus argent: & qu'on luy faict quelque des- plaisir, ou qu'il a perdu son proces, Dieu sçait, combien de saintz propos de abandonner tout: non pour laisser sa maluersation: mais pource, que ses besongnes uont au rebours. Mais guieres ne dure ce bon propos, prouenu de force, & contraincte ennemyes de uertu. Tesmoing que si nostre monsieur du Courtisan, uient à prosperer en biens, ou qu'il s'auācē chēs le Prince, uous uoyrrez ses desirs refroydir, et sa uoulunté s'eschauffer à paruenir, de sorte, qu'on le iugeroit estre nay pour la court seulement, La faueur, & la conuoytise guident le Courtisan, en maniere, que



que l'ung croist avec l'autre, & en fin deuient en lieu de Chrestiens, Courtisans. Car (comme chascun sçait) la Court est le lieu, ou l'on peut uenir à grands biens: aussi est ce le lieu, ou l'on est coustumier de ce perdre. Nous auons desia dict les occasions, par lesquelles on se retire de la Court: qui sont faulte d'argent, paoureté, ou qu'on se uoyt hors de grace, banny, ou deshonoré, ou uieil. Touts ces cas son de neceßité, & rien de franche uoulunté: & par cōsequent point de louange à celluy, qui sonne à la retraicte par les susdictz moÿs. Mais le uray mespris du monde, & de la Court est, quand le Courtisan est ieune, robuste, fauorisé, riche, & sain: & lors de bon cueur il laisse la Court pour trouuer ailleurs repos honneste, selon sa qualité. Cella se dict, afin que celluy, qui s'en ua de la Court, la laisse ioyeusement, & sans regret: de paour aussi, que de puis, que son regret seroit passé, quil n'osast de honte retourner en ladicte Court, ou il pourroit auoir affaire. Les hōmes superbes, & impatientes font beaucoup de cas en ung seul iour, qui sont dignes d'estre pleurés toute leur uie. A comparaison ung colere testu, n'est bon à estre courtisan.

tisan. Car s'il se uouloit uenger des hontes, iniures, cautelles, & trôperies, qu'on use en Court, tienne ce pour dict, qu'il en souffrira plus en une heure, qu'il n'en scauroit uenger en dix ans. Qui conque laisse la Court, la laisse hardiment pour tousiours mais: pource, que s'il y retourne: & se lasse de demeurer en son uillage, on le doibt tenir, & reputer comme malade, qui resue en fièvre continue, Celluy, qui peche, & s'amende, puis retourne en son peché, peche plus grièvement, qu'il n'auoit fait la première fois. Semblablement, laisser la Court, puis y reuenir, est une faulte tant euidente, qu'on ne la peut couvrir. Si n'est de dire, qu'on y uia uendre uertu, & acquiesrir des richesses. A propos: Si nous demandions à quelque homme ancien, quel a esté le discours de sa uie, & qu'il nous respondist, qu'il a beaucoup entrepris, erré, parlé, cherché, trouué, perdu, &c. Nous dirions, que sa uie a esté une bien dissimulée folle. Que dirons nous des inconstants Courtisants, qui sont quotidian de tout cela? Qui s'oublent eulx mesmes, pour l'appetit d'un peu de faueur, qui vont cõtre leur naturel flatter, & coquiner? Aduise sur tout, beneuole

Lecteur

Lecteur icy, & ailleurs, que ie ne parle, que des  
 moins saiges Courtisans, que ne peuuent reffre-  
 ner leur appetit, à iuste contentement: qui est la  
 difficulté, que ie uoy la plus grande, à qui aban-  
 donne la Court: à raison de ce, que reffrener le  
 cueur, est plus grãd' peine, que cõteter le corps:  
 car le corps se lasse de pecher: & le cueur ia-  
 mais de desirer. On congnoist facilement la  
 complexion du corps: mais l'instinct du cueur  
 iamais n'acheuons de le congnoistre: & moins  
 de le contenter. Pource qu'à chascun pas il re-  
 quiert une chose: & deux iours apres l'oublie.  
 O cueur dissimulé, qui soubz ombre d'estre clair  
 & loyal, nous faict entendre, que hypocrisie est  
 deuotion: qu'ambition est gentillesse: auarice,  
 mesnagement: cruaulté, zele: trop parler, elo-  
 quence: sottise, grauité: & dissolution, diligen-  
 ce. Conclusion, que chascun doibt cõgnoistre sa  
 portée: & si on uoyt sa cõditiõ ambitieuse, impa-  
 tiente, & cõuoyteuse, qu'on demeure à la Court  
 Au cõtiraire, si le Courtisan sent sa nature cõten-  
 te, paisible, & aymât repos, qu'il soit casanier au  
 uillaige: & il cõgnoistra, qu'il ne sceut oncq, que  
 c'est de uiure iusque à tant, qu'il s'est retire.

De la



De la vie, que doit mener le  
Courtisan, depuis, qu'il  
aura laissé la  
Court.

## Chapitre IIII.



Ironides docte Philosophe, & sage Capitaine Boëtien, disoit que la prudence se cōgnoist en ung per sonnaige, non tant à se retirer du mal comme à choisir le bien: pource, que cōmune- ment sous le mal aucun bien ne se peult ca- cher: mais sous le biē, beaulcoup de mal se peult dissimuler. Tout ainsi, que l'antienne commence, per signum crucis, & se finist en Satanas & Bar- rabas: pareillement, les grands maullx ont com- mencement en aucuns biens faincts de sorte, qu'ils uiennent contrefaiets comme masques, suc- crés comme pillules, & dorés comme reubarbe. Il n'est homme si insensé, qui ne se garde du mal, qui est notoirement mal: mais la sapience est, se contregarder de ce, qu'on sçait n'estre du tout bon. Alexandre le grand se faisant guerir de quelc-



quelques playes, qu'il auoit receues à une bataille, fut reprins de son grand mignon Parmenio, d'estre trop hazardeux à la guerre: auquel Alexandre dist. *Affseure moy mon amy Parmenio de ceulx, qui sont amys dissimulés: car ie me garderay bien des manifestes.* Alcibiades, Agesilaus, Pyrrhus, Antigonus, Lentulus, & Iulles Cesar, furent si aduisés en cela, qu'ilz furent tousiours uainqueurs: & moururent entre les mains de leurs amys, & ce principalement, pour le choix des bonnes choses, & mespris des petites. A propos celluy, qui laisse la Court doit regarder non seulement ce, qu'il laisse: mais aussi ce, qu'il prend, Veu que autant ou plus est difficile, de se trouuer bien, ayant laissé la Court, comme de la laisser. Que proffite sortir de la Court las, & fâché: si le cueur ne trouue repos au lieu, ou il s'est retiré? Nostre corps repeu, & saoulé de uiandes ua, ou lon ueult: mais le cueur n'est iamais saoul de desirer, Et uouldroit estre (si faire se pouuoit) fauorisé des Princes en Court, & d'autre part à son ayse au uillaige. Si le Courtisan porte à sa maison les passions, & affections, qu'il a gagnées à la Court, il luy  
C seroit

seroit mieulx, n'en estre iamais bougé : la raison est, pource, qu'en la solitude sont les souuenirs plus picquants. Et les hommes moins occupés à resister, A la Court des Princes aduient aucunesfoys, que la faulte d'argent, & grandz affaires font abstenir l'homme de mal faire : lequel depuis estant en sa maison, faict des faictz si indignes d'ung gentil'homme, qu'ilz merissent d'estre corrigés, uoyre chasties aigrement. Il est aussi une sorte de gens, qui s'en uont de la Court, pour estre plus oysifz à leurs maisons, & par consequent uitieux: telz ueult bon iugement, qu'on reiecte du nombre des hommes, puis qu'ilz ayment le temps à gré pour pecher. Aultres sen uont de la Court, craignants estre infames, & deshonnorés: lesquels depuis estants au uillaige perdent avec la honte, toute raison. Pour obuier à ces choses, conuiendroit à celluy qui laisse la court, laisser les partialités, qu'il a suiuyes, & oublier toutes passions: aultrement plaindroit les douceurs ameres, qu'il laisse : & pleurerait la uie, qu'il commence à prendre. Il est certain que l'ō a plus d'occasion de se perdre à la Court: & à la maison pour se sauuer. Si est  
ce, que

ce, que peu proffite au Courtisan, la mutation, de la region, sans muer par mesme moyen, sa condition. Quand le Courtisan, dit, Ie me uelx retirer à mon pays, & aller mourir à ma maison, c'est bien dict: mais il souffiroit pour ce coup, qu'il se retirast honestement, sans encore determiner du mourir. Ceste uie mortelle est ainsi prescripte, qu'on ne la doibt poursuyure à regret: mais aussi est on obligé à l'amèder. Quand Iob disoit. Tædet animam meam uitæ meæ, ce n'estoit pas, qu'il se fâschast de uiure: si n'est d'autant, qu'il ne s'amendoit point. Quicunque laisse la Court, peult dire hardiemēt, qu'il ne uap pas mourir: ains doibt penser. qu'il eschappe d'une belle prison, d'une uie confuse, d'une maladie dangereuse, d'une conuersation soupçonneuse, d'ung sepulchre magnificque, & d'une merueille sans fin. Le saige en Court, peult dire chascun iour, qu'il se meurt: & à sa maison aux champs, qu'il uit. Raison: que chose de ce monde ne se peult cōferer à la liberté de pouoir faire ce, qu'on ueult: & quād on ueult. Ie ne ueult pas dire, que beaulcoup de gens ne facent leur debuoir à la Court, Mais ie scay trop biē, que pour dix liures



qu'ilz ont d'honneste uolunté, ilz n'ont pas de  
my once de liberté, Semblablement doit celluy  
qui laisse la Court, remedier à l'aduenir, & dō-  
ner bon ordre à ses affaires. Scachant, que pour  
aller iusques à son pays ne fault pas grandz  
iours: mais pour se despoiller du mauuais ha-  
bit, qu'il a uestu en Court, fault ung bien long  
temps. Les uices croissent à l'homme peu à peu:  
aussi les fault il arracher petit à petit. Aussi  
doibt le Courtisan allant chés soy, esplucher par  
le menu les uices plus notables de soy, & s'en de-  
liurer bellement, ung aujourd'huy, demain l'aul-  
tre: de sorte, que quand ung uice s'en yra, soub-  
dain une uertu y uienne: & que avecq le temps,  
soit faict de bon, meilleur. Le Courtisan n'est en  
rien plus deceu, que ayant demeuré trente ans en  
Court perdu, pense en ung, ou en deux estre sai-  
ge, & se recongnoistre. A faulte d'entendre,  
qu'il fault plus sans cōparaison de temps à desap-  
prendre le uice, qu'à apprendre uertu: mesme-  
ment, que uicieuse habitude entre dedās noz por-  
tes en riant: & s'en ua plaignant, & pleurant.  
O combien est grand le desplaisir du Courtisan  
ambitieux, quand il ne peult commander, com-

me il fouloit, du conuoiteux, quand il ne gaigne,  
 du colere, quand il ne tence: Dont fault dire,  
 que si pour abandonner la Court est requis bon  
 cueur: aussi est bon sens, pour iouyr du repos  
 priuè. Ceulx, qui abandonnent la Court pour  
 faincte, sont de telle nature, qu'ilz ont plus de  
 peine à se ueoir absentes, qu'ilz n'eurent de plai-  
 sir en elle: lesquelz selon mon conseil, ne la deb-  
 uoyent laisser seulement, ains oublier du tout.  
 D'auantaige doibt ledict courtisant se retirer en  
 telle maniere, qu'il n'y laisse nulles occasions d'y  
 retourner, de paour, que la solitude de sa mai-  
 son, ne le contraigne desirer les uoluptes de  
 Court. Au cueur du prudent retiré, toutesfoys  
 que uacquent Eueschés, ou offices, ou aultres di-  
 gnités, les pensements, & affections donnent une  
 alarme, quand il pense, que s'il ne se fust si tost  
 retiré, il eust esté grand, & auancé. Dieu scait  
 si aultresfoys, qu'il en a uacqué, il en a heu.  
 N E G O en grosse lettre. Et s'il ne uault beaul-  
 coup miculx d'ouyr le bruyt de sa maison, qu'a-  
 uoir la honte de refus à la Court. Les destinées  
 des Courtisians sont si proüptes, & occasionnées  
 que le plus souuent on y est contrainct les mes-

priser, plus par neceſſite, que par uolunté. Et ce  
pendât on ſi acheue ſans y pēſer. Quand le Courti  
ſan uiēt à ſe reposer chēs ſoy, ſur tout il ſe doit  
garder de ſe fāſcher. Car s’il uiuoit en Court  
mal uolu: il uiuroit au uillaige deſeſperé. La ſol  
litude, l’importunité de ſa femme, la ſollicitude  
des enfāts, les fautes des ſeruiteurs, & les mur  
murations des uoyſins le peuuent bien eſtonner.  
Mais ſe ſouuenant, qu’il eſt eſchappé du gouſ  
fre perilleux de court, doit ſe reputer demy  
Dieu. Oultre, aulcū ne doit preſumer, que pour  
uenir demeurer au uillaige, ſoit exempt de cher  
cher fāſcheries, & trouuer neceſſités: pource  
qu’il peut eſtre, que celluy, qui ne trebuſcha  
oncq en chemin tortu, & pierreux, tombe bien  
en beau chemin plein, & ſe rompt le col. Par  
quoy fault, que le retiré prenne le temps comme  
il uiendra, & qu’il s’occupe le plus, qu’il pour  
ra, à uertueux exercices: affin que le trop de re  
pos, & le trop penſer de l’eſprit ne le laſſent, ou  
empēſchent le bien du mediocre contentement.  
Ioinct, qu’en ce monde il n’y a choſe tant enne  
mye de uertu, que l’oyſiueté: de laquelle pren  
nent commencement les penſées ſuperflues, &  
conſe.



consequemment les hommes perdus. N'est pas à plaindre le Courtisan, qui ne s'occupe, qu'à boyre, manger, & dormir: & son meilleur aage ce pendant s'en ua en fumée, & songes, qui procedent d'estre sans rien faire à la Court, ou il pouuoit estre au uillaige se exerçant à son honneur, & sante de sa personne? Pareillement doit le Courtisan, qui se retire chés soy, procurer de congnoistre, & hanter les saiges, & choysir les compagnies des bōs: affin qu'en lieu des flateurs, menteurs, & flagorneurs, qu'il frequentoit à la Court, soit accompagné au uillaige, de prudents amys, ou quoy que soit, de bons liures, ausquelz il employe le residu de son temps gratieusement, & avec telle modestie d'entretenir chascū, qu'il puisse dire qu'il est uenu de la Court pour plaire aux bons, & non pour dominer. Si d'adventure on le uouloit faire au uillaige Consul, ou ayant aultre fonction publique, ie luy conseille, qu'il s'en garde, cōme d'une peste: pource, qu'il ne'st rien si trouble, ne si dur à supporter à l'esprit, comme la charge du menu peuple. Ie ne dy pas, qu'il ne puisse, & doibue ayder les pauures uillageois de congnoissances en Court,

quand en auront besoing: ou d'argent, ou de fa-  
ueur. Aussi si les ueoit mutins, appaiser: si en pro-  
ces, appoincter: & si mal traicter d'aultruy, des-  
fendre. Et sera par ce moyen estimé du commun,  
& loué des saiges. Garde soy sur tout d'estre  
prodigue en habits, ou superflu en banquets de  
uiandes delicates, & uins precieulx. Car la fin  
de s'absenter de Court, est pour uiure sobremēt,  
non pas friandement: pour satisfaire à nature, nō  
à la uolupté. Aultremēt feroit du uillaige, Courti-  
san qui doibt faire de la Court, uillaige. Le Courti-  
san retiré doibt auoir misericorde en singuliere  
recommandation, comme uisiter hospitaulx, se-  
courir paoures, consoler orphelins, uisiter les  
prisonniers, lire les saintes Escriptions diligen-  
ment. Qu'il pense à bien disposer de ses biens, se-  
lon raison durant sa uie. Car quād il feroit mort,  
chascun chargera son bien: & nul ne deschar-  
gera son ame. Finablement conseillons au Cour-  
tisan, qui s'est retiré, qu'il ne s'occupe à aultre  
chose, qu'à s'appareiller à bien mourir, Toutes  
ces choses susdictes, ne dye personne, qu'elles  
sont plus aysées à lire, qu'à faire. Car si nous nous  
uoulions efforcer, nous sommes plus, que nous  
mesmes

mesmes de nous mesmes ne pensons.

Que la vie Rusticque est plus tranquille, & privilégiée, que celle de la Court.

### Chapitre V.

**L**E uillaige, de quoy nous parlons, & les domaines d'icelluy, posons le cas, que le tout y soit franc, & allodial, nō subiect à Seigneur direct, ou util (comme il est en ces terres d'obeyssance) à priuileige tel, que chascun uit en sa maison, qu'il a par succession, ou achept, franchement, & sans seruitude quelconque. Ce qui n'est en Court, ny au respect de ceulx, qui la suyuent: ny de ceulx, qui la logent. Pource, qu'il fault à monsieur du Courtisan gaigner le Marechal des logis, auoir son bulletin, arriuer bien tard, fâcher son hoste, rompre les portes, abbatre murailles, despauer maisons, brusler menuiserie, & quelque fois battre l'hoste, & uioler sa femme. O biē heureux, qui a de quoy au uillage, sans arpenter tant  
 § de terres





de terres estranges, sans muer tant de logis, sans essayer tant de conditions de gens diuerses, sans fâcher personne, mais estant sur son me= diocre bien, est hors de tous ces rompements de teste. Aultre priuileige du uillaige est, que le gentil homme, ou bourgeois, qui y ha= bite, peult estre le plus, ou ung des plus grands, soit en bonté, honneur, ou authorité. Ce qui n'est en Court, & grâds cités: ou lon uoyt beaul= coup de gēs, qui precedent en train, en braueté, en richesses, en credit, & en maison. Iulius Cesar disoit, qu'il ay moit mieulx estre premier au uil= laige, que second à Romme. Pour les hommes, qui ont les pensées haultes, & la fortune basse, seroit mieulx uiure au uillaige en honneur, qu'à la Court, abbatu, & sans faueur. La difference de demeurer à ung lieu petit, ou à ung grand est, qu'au petit on trouue beaulcoup de gēs pau= ures pour en auoir compassion: & au grand, beaucoup de riches, pour en auoir enuie. Aul= tre priuileige du uillaige est, que chascun iouyst en paix de ce, que Dieu luy a donné, sans ce, que aucun uienne à la maison du uillageois faire des= pences extraordinaires, seduyre sa femme, ou ses

*Iulius Cesar*

ses filles. Les occasions de mal faire y sont amor-  
 ties, à raison de ce, qu'il se occupe à entretenir  
 son mesnaige, à conduyre ses filles, à endoctri-  
 ner ses filz, & à chastier ses seruiteurs. Il uit re-  
 posé, non importuné : il uit conforme à raison,  
 non à son opinion: uit comme celluy, qui espere  
 mourir, non comme celluy, qui cuyde tousiours  
 uiure. Au uillaige, tu n'as cure d'estre au bon lo-  
 gis, de donner ordre aux cheuaulx, aux mulets  
 de coffres, tu n'entends cryer les paiges, plain-  
 dre les maistres d'hostels, babiller les cuysiniers,  
 tu ne crains iustice, ne iuges, qui te soyent trop  
 seueres: & qui mieulx est, tu ne trouues truhans  
 pour t'affronter, ny dames pour t'abestir. Aultre  
 priuilege du uillaige est, qu'il y a assez tēps à tou-  
 tes choses: mais qu'on le departe bien: assez tēps  
 à estudier, assez à ouyr messe, à uisiter ses amys, à  
 courir à la chasse, qui ueult: & assez à prēdre ses  
 repas. Ce, qui n'est en la liberté des Courtisans:  
 ueu, qu'ilz employent le plus du tēps à negocier,  
 & faire la Court, ou (à dire mieulx) à souffrir,  
 de sorte, qu'on peult dire d'eulx ce, que dist l'Em-  
 pereur Augustus d'ung Rommain grand nego- *Augustus*  
 ciateur, qui estoit ce iour mort. Je m'esbays,  
 dist

dist il, puis que le temps luy faillloit à traffiquer, comme il a peu trouuer le loysir de mourir. Autre priuileige a le uillage. Assçauoir, que les uillageois s'en peuluent aller seuls parmy le uillage sans tōber en uice de rompue grauité. Il ne fault nulle, housse, ny paige à Monsieur: ny Damoysselles à ma Dame, Mais (ce qui seroit ridicule en Court) seul, & sans dangier on ua se pourmenant de uoysin en uoysin, & d'heritaige en heritaige, sans diminuer en rien l'honneur.

Aultre priuileige est, que chascun peult au uillage aller comme bon luy semble, & ou bon luy semble, uestu d'une cappe, ou en pourpoint, une serpe à la main, ou une espée, ung baril, ou une hacquebutte. S'il se fasche de chausses descouppées, qu'il porte des gvestres: s'il a froyd, qu'il prenne sa robe fourrée: tout luy est ung. Vng gentil homme demeurant au uillage, ayant ung bon sayon de drap, une cappe, & soulliers de cuyr, s'en ua à l'Eglise aussi paré, comme à la Court ung grand Seigneur fourré de Martres. Vng uillageois, qui que soit, est aussi heureux d'aller au marché, ou à la foyre, querir la provision de sa maison sur une iumēt, ou petit caualin,  
comme



comme ung seigneur de court aux ioustes, sur  
 ung coursier de parade, capera sonné de drap  
 d'or. Et (quād tout est dist) mieulx est au paoure  
 talonner ung asne, uiuant comme il doibt, que au  
 riche bien monté, pillant le bonhomme.

Qu'au villaige semblent les iours  
 plus longs, l'aër y est meilleur,  
 & les maisons plus aisées.

### Chapitre VI.

**P**oursuyuant les priuileiges du uillai  
 ge, ne fault oublier, que celluy, qui y  
 demeure, a commodité entre aultres  
 choses de bons bleds, & par conse=  
 quet bon pain, bien cuyt. Au cōtraire à la Court,  
 pain le plus souuent mal cuyt, mal paistry, ou aul  
 trement mal assaisonné. & en est la cause: pour  
 ce, que aux uilles en matiere de bleds y a souuen=  
 tes foys faulte, ou mauuais moulins, ou eaues, qui  
 ne uallent guieres, dont on a ueu aultres foys  
 grandes mortalités. Aultres priuileige est au uil  
 laige, que ie loue bien fort, que celluy, qui y de=  
 meure,

meure, peult faire plus d'exercices, & mieulx employer le temps, qu'à la Court, ou es grosses uilles, ou il fault estre diſſimulateur, peu parlant, ſainct, uindicatif, & trotteur de paué, ou fault tenir grauité, peu bouger de ſa maiſon, & inceſſammēt trēcher du gros. O demy dieu, qui habite au uillaige, ou libremēt on dict ce, qu'ō ueult, ou lō iase à toute heure avec lesuoysins deuāt la porte à la place, par la fenestre. Et ce ſans iamais perdre riē de meſurée authorité. Aultre priuileige est au uillaige, q̄ ceulx, qui y demeurēt, ſont ſans comparaiſon plus ſains, & moins malades, que aux cités, & court: pource, que es uilles les maiſons ſont haultes, & les rues eſtroictes, & boueuses, qui est la cauſe, q̄ l'aër s'y corrōp, & rend mal ſaines les pſonnes. Au uillaige les maiſōs ſont plus amples, les hōmes mieulx diſpoſés, l'aër meilleur, le Soleil plus clair, la terre plus eſſuyte, le biē du priué, & du cōmū, regys ſans cōtētiō, l'exercice plus cōtinuel, la cōpaignie plus ſeure. Et ſur tout les penſemēts moindres, & le paſſetēps plus grād. Aultre priuileige, qu'il n'y a au uillaige ieunes medecins, ny uieilles maladies: & a ceſte Court, à partir le bien du Courtiſan en quatre parties, uoyrrez, que l'une est aux flatteurs,

L'autre aux aduocats, L'autre aux apothicaires,  
 & l'autre aux medecins. O biē fortunē uillaige,  
 puis qu'on y sçait, que c'est, que de uerolle, enco-  
 res moins de chācres. Iamais n'y fut parlé de pa-  
 ralyſie, la goutte n'y est hereditaire, iamais n'y  
 ſceut on, que ueult dire Iulep, bolus, ſyrop, apo-  
 zime. Et n'y a lō eſmoy, que biē tard. Que uoulez  
 uous, que ie dye plus du uillaige? Sinō que ſi ce n'e-  
 ſtoit pour edifier quelques maiſonnettes, à peine  
 ſçauroit on q̄ c'est de mortier, & de pierres. Et  
 encore on ſe cōtēte ſouuēt de quelques cahuetes  
 de boys biē agēſſies. Aultre priuileige eſt, que les  
 iours y ſemblēt eſtre plus lōgs, & ſi les employe  
 on mieulx, ce qui n'eſt à la Court, & aux uilles:  
 ou les ans paſſent ſans qu'on les ſente: et les iours  
 ſans qu'on en iouyſſe, Et cōbiē, que les eſbats ſon-  
 yēt plus grāds au uillaige, q̄ aux uilles: ſi eſt ce,  
 que ung iour durera plus au uillaige, qu'ng-mois  
 à la Court: à raiſon de quoy le uillaige eſt heu-  
 reux, ou le ſoleil ſemble faire plus long tour. La  
 matinée y eſt prōpte, le ſoir pareſſeux à uenir. A  
 paine ſēt on couler le iour à la Court: aux chāps  
 ſi on le ſent, on l'employe, à cauſe des occupatiōs  
 plus frequētes. Aultre priuileige eſt, qu'on y a  
 plus grāde quātite de boys, fōins, pailles, auoyneſ



à meilleur marché, que aux uilles. Aussi au uillage on a priuileige de prendre les repas, ou lon ueult, quād on ueult, & avec qui lon ueult. Mais en Court on mange tard, la uiande mal appareillée, froyde, ou sans saueur: & qui pis est, la pluspart du temps avec ses ennemys: ou le bon uillageois uit à souhait, & sans soupçon, gardant les troys bonnes cōditions, que le repas doit auoir: c'est, qu'on le gaigne, puis qu'on le mange ioyeu sement: & que ce soit en bonne compaignie.

Aultre priuileige est, que les uillageois ont, à quoy s'occuper, & recreer: ce que n'a le Courtisan, ou citadin, qui ont assez ennemys à craindre, & peu d'amys à leur faire compaignie. O recreation du uillage à pescher aux fillets, à l'haim, à belle chaulx, à chasser à chiens, au furon, aux cordes, à l'arbaleste, ou hacquebutte, aux ramiers, aux canards, aux perdris, à ueoir labourer les uignes, haulser les fossés, refaire les hayes, à railler avecq les anciens laboureurs. Touts ces plaisirs ont ceulx des uillaiges, quand Courtisans, & citoyens les desirent.

Que

Que les Villageois sont plus heureux communément, que les Courtisais.

## Chapitre

## VII.



Vltre priuileige du uillaige est, qu'on y sent moins les trauaulx, & on se resiouyst mieulx aux festes, qu'à la Court: en la quelle avec grã de confusion de negoces, & tromperies on ne cõgnoist iamais, qu'il soit feste. O uillaige, il n'est pas ainsi en toy, ou le iour de feste le Sacrestain ne cesse de carrillonner, de nettoier l'Eglise, de parer autels: le peuple est paré: le pain benist s'y donne, les festes s'y commandent: le Curé presche l'Euangille, excommunie le mauuais: & apres disner on se recrée à mil honnestes esbats. Aux uilles on congnoist la feste, quand les femmes se fardent, quand on dort la grasse matinée, quand on ioue apres disner: & generallement, quand le iour se consomme en uoluptés.

Aultre priuilege a le uillaige en matiere de gibbier, que n'ont les Courtisais, ou citadins.

Car en lieu, que le Courtisan use de chairs, & uenaisons corrompues, & de gibbiers trop gardés: le Villageois mange tout frais, sain, & tendre: comme pourriez dire en saison, pigeons domestiques: tortorelles, perdriaux, poulets, ramiers, ronquets, phaisants, gras chapons, connils, lieures, & aultres innumerables gibbiers. Et si a d'aduantaige, brebis pour s'abiller, moutons pour manger, & cheureaux: bœufs pour labourer, uaches pour faire formaiges, pourceaux pour saller, iuments pour nourrir, & cheuaux pour son seruice, & pour uendre, si besoing est. Aultre priuileige est au uillaige, que le bon y sera honoré pour bon, & le meschât congneu meschant: ce que n'est en Court, ou nul n'est prisé pour ce, qu'il uault: mais pource, qu'il a. O combien est honoré le preud'homme au uillaige, pour son saige aduis naturel, combien il a de gratuites, & de presents. Si on trouue quelcque bon fruit à son iardin, ung bon melon, une bonne poyrë, ung muscadel, on le luy donne, comme à celluy, qui le merite. Aultre priuileige, que chascun y peult marier ses filles, à ses esgaulx, & uoysins, pour en auoir de iour en iour



iour plaisir, & seruice: ce que ne peuluent faire les Courtisans, qui marient leurs filles si loing d'eulx, que plus souuent les regrettent, qu'il ne les uoyent. O heureux uillageois, qui trouue à sa porte, espoux pour ses filles, et espouses pour ses filz. Il les marie pres de soy, ayse de ueoir ses gendres, ses petits nepueux, sa posterite: il est ayme, secouru à ses affaires, & seruy à ses maladies: à ung tresgrand soulas de sa uieillesse. Aultre priuileige, que les hōmes n'y ont trop de solitude, ny trop d'ennuyeuse importunité: duquel priuileige ne iouyffent ceulx des cités, & Court ou faillent souuent deniers, & gros affaires commencent. O uillageois, qui n'a cure d'aller à dix heures au palais, mendier conseil, solliciter l'huyfier, accōpaigner le Presidēt, faire l'inclinabo à l'aduocat, qui n'a aussi besoing faire la Court au flateur, au magistrat, ny au Roy. Mais a en lieu de ces ydolatries, pour heureux soulas les merueilles de nature, & le passetēps d'ouyr beler les brebis, brayre les taureaux, hānir cheuaulx, chanter rosignols, fredōner tarains, grimgotter linottes, ueoir courir chiēs: saulter moutons, gābader cheureaux, ueoir faire la roue aux

D 2 paons,

*Codasquer*

paons, d'ouyr codasquer poulles, crester coqs,  
 & ueoir follatrer mille autres bestes. Aultre  
 priuileige est au uillaige, que les hommes y peul  
 uent estre plus uertueux, & moins uitieux, qu'à  
 la Court, & grands cités. Et est la raison,  
 qu'aux grâdes compaignies communement uous  
 en trouuerez mille, qui destournent de bienfaire,  
 & dix mille, qui incitent à mal. Et au uillaige  
 chascun sanctifie le Dimenche, garde les festes,  
 oyt messe, entend le sermon, & on faict par ce  
 moyen son salut en grant liberté. D'allicurs est  
 louable le uillaige, de ce que les occasions de se  
 perdre n'y sont comme aux uilles, & Court: pre  
 mierement il n'y a estats, dont on puisse conce  
 puoir enuie, il n'y a châges pour bailler, & pren  
 dre à usure: rontisseries pour estre friand: Da  
 mes pour seruir, querelles pour se battre, &  
 Courtisans pour requerir, tournoys pour s'ar  
 mer, ieux publicques pour se destruyre: iustices  
 à craindre, ny (qui mieulx est) conuoitises pour  
 du tout se enterrer. Aultre priuileige, qu'on y  
 peult amasser du bien. & moins despèdre, qu'en  
 Court. Car chascun sçait bien, quelz frays, &  
 cōbien excessifz on a accoustumé faire en Court:  
 mesme

mesmement au iour d'huy, que les appareilz sont  
telz qu'ilz meritent reformation. O paisible vil  
lageois, à qui ne fault tapissierie de Flâdres, linge  
de Hollande, uaisselle d'argent, liect de camp, ha-  
billements brodés, passéments, pourfilés: à qui ne  
fault charroys, mullets, ualets pour le conduyre,  
ny aultre attirail superflu. Au contraire, en lieu  
de tout cella, il se contente bien d'ung mesnaige  
petit, & bien reiglé, d'une table grossiere, de  
chaires communes, de chalits tout plain, avecq  
de uaisselle d'estaing, ung liect en mataras, cour-  
tines de simple large, deux robbes, une d'esté, &  
une d'huyér, ung courtault à l'estable, ung bon  
logis, ung ualet, & chambriere pour son serui-  
ce. Aultant heureux, & hōnoré est ung gentil hō  
me, avec ce moyen mesnage en sa maison  
de uillaige, comme ung riche sei-  
gneur de Court, avec son  
grand meuble  
& su-  
perbe train.

D 3 Qu'aux



Qu'aux Courts des Princes la coustume, & style est de parler de Dieu, & viure selon le monde.

## Chapitre

## VIII.

**E**N Court, cōme n'y a iustice rigoureuse: ny Pere, qui chastie son filz: ny amy, qui corrige l'autre: ny uoy sin qui ayme l'autre, ny Curé, qui admōnestre ses brebis selō l'Euāgile. Aussi celluy, qui est de sa nature bon, y a grād' liberté d'estre mauuais. A la Court si quelcun ueult adulterer, il a cōplices: s'il a querelle, trouuera, qui mettra la main à l'espée: s'il ueult bancqueter, a chascun pas trouuera gloutōs: s'il ueult publicquemēt mētir, il trouuera, qui approuera ses mēsonges: s'il ueult defrober, on luy dira mille subtilités pour y paruenir: s'il ueult iouer, il y a tant de chartes & de dez: s'il ueult iurer faulx, il y aura gents, qui le payeront. Finablemēt s'il ueult s'addōner à toutes sortes de mal faire, en la Court en sont les parfaictz exemplaires. A la Court abordent gens de diuerses nations, pour negocier, plaider ou ser=

ou seruir, ou se mōstrer: lesquelz, depuis qu'ilz se uoyent ung tant peu soit cōgneus, suyuent les seruiteurs des plus grands, suyuent les compaignies, les tabourins, les musiciens, les flatteurs de Court, ceulx, qui contrefont les plaisants. Et deuient à la parfin paoures gentil'hommes, & vont demandant presents, estraines, ou habillemens, Et (de malheur) ceulx, qui leur donnent quelque chose, le font plus pour estre dictz magnificques, que charitables. A la Court fortune est inconstante, en ce qu'elle promet, & encores plus en ce qu'elle donne: d'une heure à aultre l'ung tombe, l'autre lieue: l'ung naist, l'autre meurt: on aduance l'incongneu: & le seruiteur est oublié: on ne ueult point de celluy, qui uient: & prend on celluy, qui s'en ua: on croyt les fols, & desment on les saiges: & suyt on opinion, pour laisser raison. Auecq ces choses, & aultres semblables, qui se uoyent, & essayent aux Courts des Princes, chascun a esperance, que fortune uiendra bloquer à sa porte: bien que la pluspart des Courtisans rencontrent plus tost ung sepulchre, que une fortune. Et mesmement ceulx là, qui soubs couleur d'estre de bonne

maison uont à la Court faire des braues, qui tous  
tesfoys sont tant sotz, & ignares, qu'on les di-  
roit plus tost aptes à la charrue, qu'à la lance.  
Qui ne seruent à la parfin, que d'estre passetèps  
aux mocqueurs. A la Court a ung mal: qu'il y a  
tousiours inimytiés entre princes, enuie entre les  
familiers contentions entre les officiers, querel-  
les entre coleres. Et si n'y a iamais à ce faire faul-  
te d'entremetteurs, qui gagnent plus en ce fai-  
sant, que ne feroit ung bon Theologien à pre-  
scher. En Court tout s'y permet, tout s'y dissi-  
mule, tout s'y endure, tous y passent, tous y pen-  
nent, & tous y uiuēt: & puis que tous y uiuēt,  
il est difficile, qu'on n'y mente, qu'on n'y ioue,  
qu'on n'y raporte: & qu'il n'y ayt infyns me-  
schants. A la Court les gastés suyuent les ung les  
aultres. Le mutin trouue, à qui se battre: l'adul-  
tere, avec qui pecher: le larron, compaignon, &  
recelateur. Le sophiste disputeur, & tous en-  
semble, rencontrent à la fin, qui les trompe. A la  
Court, chascun se prise de saintes propos, & he-  
roïques pensées: ung dira, qu'il se ueult retirer  
de la Court: l'aultre dira, qu'il ueult oublier ne-  
gocios: & l'aultre, qu'il ueult estraindre inimy-  
ties.



ties. Et quand tout est dict, ce sont bonnes parol  
 les: mais ce pendant le cueur est en possession d'e  
 stre au monde. Touts y sont mescongneus, le gen  
 d'arme y ua sans armes, le Prelat sans habit, le  
 Prebstre sans breuiare, le moyne sans licence, la  
 fille sans mere, la femme sans mary, le lettré sans  
 liures, le larron sans espies: le gourmand, de ta  
 ble en table, le uagabond de place en place, & la  
 macquerelle d'huy en huy, & de garse en gar  
 se. A la Court, touts sont cuesque pour cresmer  
 & curés pour baptizer, & muer noms. Car  
 on appelle le glorieux honorable, le pro  
 dige magnifique, le couart saige, le  
 uillant oultrecuydé, le fol ioyeux,  
 le saige hypocrite, le malicieux  
 subtil, le deszorgé eloquent,  
 l'adultere amoureux, l'aua  
 ritieux temperé, & le  
 peu parlant sot,  
 & ignare.

D 5 Qu\*

Qu'a la Court le nombre est petit de  
ceulx, qui melioient : & infir-  
mys ceulx, qui s'y  
perdent.

## Chapitre

## IX.



N la Court peu profite, que les hō-  
mes soyent saiges, s'ilz ne sont for-  
tunes, uen que les seruices s'y ou-  
blient, les amys faillent, les enuyes  
s'augmentent, la noblesse se mescongnoist, la sciē-  
ce n'est congneue, l'humilité est mesprisée, la ue-  
rité cachée, & le conseil refusé, La meilleure mi-  
ne, & la plus riche Alcumie, que le Courtisan  
puisse auoir, est, d'auoir uēt en pouppes: & estre  
familier des fauorisés, des grands Seigneurs fai-  
sant ses besongnes ce tēps pēdāt, que fortune luy  
rit: car les cōditions, & façons d'entretenir, chā-  
gent. Pour prouuer cella, il n'est ia besoing, que  
Platō parle, ny que Cicero iure, puis qu'on uoyt  
à l'œil le fol deuenir saige, le doulx presump-  
tueux, le sobre gourmād, les pacifiques mutins,  
& les deuots assez mauuais Chrestiens. A la  
Court, est grand trauail de pouuoir trouuer uer-  
tu: & grand peril de la garder. Je demande, hu-  
milité

milité ne pereclite elle pas entre honneurs, la pa-  
 tience entre les iniures, l'abstinence entre uian-  
 des, chasteté entre dames, repos entre negoces,  
 charité entre malueillâces, paix entre seditiôs,  
 silêce entre iaseurs, & bon sens entre follie? A la  
 Court nul n'est cõtent, chascun s'y plainct, ou de  
 ce, que le Roy ne luy donne rien, ou que le Prin-  
 ce ne luy ayde: ou que quelcun le destourne du  
 president, qui ne le despesche, du portier, qui ne  
 luy ouure la porte: du thresorier, q ne le paye:  
 du creâcier, qui le faict executer: ou de quelque  
 aultre, qui luy faict tort, A la Court si on lit une  
 lettre de plaisir, on en lit cõt, qui fâschêt. La fem-  
 me escripra à son mary: elle luy mâdera. qu'il ui-  
 ne, qu'il fault marier les filles ia grandes, ou que  
 ses enfânts sont desobeysants, que les amys l'ont  
 oubliée, que par ingratitude redêt mal pour biê:  
 que fâscheriës l'assaillet de toutes parts: que ses  
 uassaulx la mettêt en procès, ou q son bien se ga-  
 ste. Tât qu'il en y a en Court, q pour cinq souls,  
 qu'il donnêt à ung porteur, dõneroyent ung escu  
 uoulütiers, & n'ouyr telles nouuelles. A la Court  
 ung hõme faict beaucoup de choses par neceßité,  
 qu'il ne feroit pour mourir en sa maison. Il disne  
 & soup



Et souppe avec son ennemy. Il parle avec celluy,  
 qu'il ne congneut iamais: il sert celluy, qui ne luy  
 agrée: defend celluy, qui ne luy ayde: suyt, qui ne  
 l'honnore: preste, à qui ne le paye: dissimule avec  
 celluy, qui l'niurie: Et se fie à celluy, qui le trompe.  
 O triste Courtisan, que s'il uient à estre pau-  
 ure, personne ne luy dōne secours: s'il tombe ma-  
 lade, personne ne le uisite: s'il meurt, il est incon-  
 tinent oublié: s'il est uertueux, nul ne le loue: Et  
 s'il n'a credit, on n'en tient compte. A la Court  
 n'a chose plus rare: ne plus chere à recouurer,  
 que uertu: ny plus aysée à trouuer, qu'abondan-  
 ce de troys manieres de gens: de rapporteurs, de  
 flatteurs, de menteurs. Les mensongiers deçoip-  
 uent les Princes: les flatteurs les riches: les rap-  
 porteurs les fauorisés: les femmes deçoipuent les  
 hommes: la conuoytise les uieux: les parents les  
 Prelats: l'auarice les prebstres: la liberté les reli-  
 gieux: l'ambition les presumptueux: la confiance  
 les saiges: Et tous ioincts ensemble sont deceus  
 par fortune. A la Court on employe si mal le  
 tēps, que des ce, que le Courtisan se leue, iusque  
 à ce, qu'il se ua coucher, il ne s'occupe à aultre  
 chose, qu'à demander nouuelles, suyure les rues,  
 escripre

escripre lettres, parler de guerre, entretenir fa-  
 uorisés, changer d'amys, parler à macquerelles,  
 faire l'amour, & perdre temps. A la Court plus,  
 que ailleurs sont les choses lentes, & tardiuës,  
 on s'y leue tard, on y ua au palais tard, on oyt  
 messe tard, mange tard, & encores s'amende lon-  
 plus tard, Tout y est muable, & inconstant : les  
 estats muent, les petits mōtent, les grād̃z chēent,  
 les uesues s'y gastent, les mariées s'y diffāment,  
 les filles y perdent honte, les bons esprits s'y he-  
 betent, les uailants y deuient couards, les Pre-  
 lats y empirent, les doctes y oublient, les ieunes  
 s'y perdent, & les uieux y sont perdus. Cest la  
 Court. Il n'est pas appellé Courtisan, qui n'est  
 bien endebté, qui ne doit au marchand du drap,  
 au grossier de la soye, au cousturier, façons, Qui  
 ne doit des bagues à sa Dame, à l'orfebure  
 la façon, au iuge les espices du procès, à  
 ses seruiteurs leurs gaiges, aux ho-  
 stes la despence: & par conse-  
 quent en tout est le mal  
 conseillé demy  
 damné.

Que

Que l'homme ne scauroit viure en  
Court, sans se passionner de  
soy ou daultroy.

## Chapitre

## X.



Ng Courtisan faict beaucoup de  
choses, plus pour dire, ie les fays cō  
ne les aultres : que pour besoing,  
qu'il en ayt. Il banquette chascun  
pour n'estre appellé hypocrite, ioue pour n'es-  
tre dict facquin, accompagne les aultres pour  
n'estre solitaire, & faict presents aux truhants  
pour n'estre blasonné d'eulx. On est à la Court  
plein de passions : car aussi est ce le naturel de  
ceulx. qui la suyuent, d'estre incessamment tour-  
mētés, Il fault louer les siens, uituperer les estrā-  
giers, il fault ueoir ceulx. qui font bien : contre-  
roller ceulx, qui font mal: despendre avec les  
compaignons, employer contre les ennemys la  
propre uie: & tout ce pour n'estre mesprisés.  
A la Court on a uoluntiers ung maistre, de qui  
on s'aduoue: mais si fault il nonobstant seruir de  
queue à plusieurs Seigneurs. O creuecueur au  
paoure Courtisan, qui fault, qu'il serue auant,  
qu'il



qu'il congnoisse: fault, qu'il fasse la reuerence, à qui ne merite, dye à monsieur l'officier cent foys le iour, s'il uous plaist: regarde, quand le secretaire sera de loysir, attende à la porte, appelle mōsieur à chascun mot, qui merite, nom de bourreau, & condescende à l'opinion de tous. En Court, comme est peimeux le demeurer: aussi est impatient le negociier. O quel pitié ueoir ung paoure sollicitateur de quelque affaire d'importance, suyure le Roy de uille en uille, mal nourry, & pis logé: le Roy est empesché, le chancelier est sourd, le thresorier n'a point de main, le congneu n'a point d'yeulx: & sans pecune, & extreme peime, les cinq cents de nature y sont perclus. A la Court combien que lon n'ayt point d'ennemys (ce qui aduient tard) si est cē, que maintesfoys les amys mesmes l'importunent. Tant que si le Courtisan ueult reposer en son logis, on le mange, qu'il ne ua ueoir ses parents, faire la Court aux Princes, qu'il ne hante les riches, & qu'il ne se faict ualoir: avec ce, que les affronteurs, & truhants se mocqueront de luy de ce, qu'il ne ioue, & ne faict du liberal. Depuis qu'on commence de s'armer à la Court,

on y

on y est si naturellement ennemy de repos, & amy de nouueaultés, qu'il fault, que monsieur l'Egyptien change plus souuent, que tous les iours de país, de logis, d'habits, de conuersation de gens, de negoces, & de façons de faire. Voyla mon amy Lecteur la uie du Courtisan tellement, quellement descripte, & aussi celle du Villageois, qui sera louee de plusieurs, & de peu choy sie, pource, que chascun lit assez de Liures, & tant moins change de coustume. Si est ce, qu'à bien pourpenser ce, que dessus, s'ensuyt, que les Cours des Princes ne sont bonnes, qu'à deux manieres de gens: pour les fauorisés, & pour les ieunes encores foibles de iugemēt. Les fauorisés, qui tiennent la main à la paste, se uoyant tant riches, tant craincts, tant accompagnés, à peine sentēt les trauaulx de Court: & le plaisir, qu'ilz y conçoient, les faict oublier eulx mesmes, & mescongnoistre tant, que rien plus. Toutesfoys il n'est possible, que la ceruelle ne se mescontente, d'estre trop chargée: leurs maisons sont tant pleines de gens, leurs oreilles de mēsonges, leurs langues tant occupées à respondre, leurs cueurs tant pressés d'ayder aux ungs, & aux aultres,  
que

que tant plus leur credit est grand, plus les uoyr  
rez tristes, & estonnés: & plus souuēt plaindre,  
que resiouyr. Commande, qui commander uoul-  
dra: ayt credit, qui uouldra: car à la fin, on ne  
peult iouyr de son bien, & richesses sans honne-  
ste repos. D'allicurs lesdicts fauorisés ont paour  
d'estre rebaisés: & par ainsi sont en crainte con-  
tinuelle, qui est ennemye de repos. Les ieunes sem-  
blablement, comme i'ay dist, sans iugement, &  
aueuglés de uices ne congnoissent les incommodi-  
tés de la dicté Court, & ne se souciēt de faueur,  
ny d'honneur: ains consicts en uoluptés, passent  
leurs meilleurs ans à l'escolle de riē ualoir, sous  
le pedagogue de perdition.

Qu'a la Court son bien estimés les  
Courtisans arrestés: & les disso-  
luz mesprisés.

Chapitre XI.

**L**E Courtisan ne se doit accointer  
d'hommes uains, & de peu d'occu-  
pation, quil ne soit reputé tel, cōme  
la compaignie, qu'il hante: car il  
E fault



fault faire comme les aultres, ou diſſimuler ce, qu'on ueoit, Et ne fault, qu'il ſe couure de dire, que s'il frequente les compaignies, c'est ſecrettement: pource qu'en Court les eſprits ſont tant agus, qu'il ſçauent nō ſeulement ce, qu'on fait: mais ce, qu'on penſe. Il n'eſt grand, ny petit, qu'on n'eſpie, ou il entre, d'ou il ſort, ou il ua, avecq qui il cōmunique, à qui il ſe fie, & qu'il ueult faire. Si bien, que les courtines y peulēt couurir les perſonnes: mais les uices nō. Le Courtiſan ne doit auſſi ſe alterer, ou ſcandalifer ſi, cōme il ueult, ne peut parler au Roy, auoir audience, ou parfaire ce, qu'il deſire: pource, que celluy, qui ſuyt la Court, la doit laiſſer, ou faire ſemblāt, qu'il n'a bouche pour parler, ny mains pour ſe uenger: ſçachāt, qu'il en eſt plus de chertē, que d'habits, ou cheuaulx. Qui n'eſt en Court armē, & ſourrē de patiēce, mieulx luy ſeroit n'eſtre iamais bougē de ſon pais, car eſtant uindictiſ, & mutin, il eſt mal uolu: & ſi s'en retourne chēs ſoy deſhonorē. Les malices, & des fortunes prēnent ſouuent fin au uillaige: & à la Court en a touſiours de reſte. Qui en eſt cauſe? la fortune, ie dy celle, qui a ſeigneurie ſur ceulx, qui la reclament

la reclament pour déesse, & qui est plus crain-  
 te par opinion, que pour puissance, qu'elle ayt  
 sur les homes. Ne doit aussi le Courtisan conde-  
 scendre à ce, que sa sensualité requiert: mais à ce,  
 que raison luy persuade, pource que l'une demā-  
 de plus, qu'il ne nous fault: & l'autre se conten-  
 te moins, qu'on n'a. Puis qu'à la Court a tant  
 de tables, ou gourmāder, tāt de desbauchés pour  
 iouer, tant de querelleux pour se battre tant de  
 brouillons pour playder, il ne se fault esmer-  
 ueiller, si les arrestés, & saiges y sont cheries, &  
 les dissolus mesprisés. Le bon à la Court est  
 ung noyau dans la pelasse, une moelle dans l'os,  
 une perle dans la conque, & une rose dans  
 l'espine. Je ne dy pas Lecteur, que pour la quan-  
 tité, & qualité des malices de la Court, tous y  
 soyent uitieux: ia ne plaise à Dieu: mais quand  
 me recorde, que nous sommes tous humains,  
 ie pense, qu'il est presque impossible de uenir  
 à bon port entre tant de Scilles, & de Caribdes.  
 Vous direz, que les caults, & subtils y enri-  
 chissent, & que les grosses sommes sont là:  
 ie le confesse, & seroit bon uostre dire,  
 si les plus sçauants, & uertueux estoient

du nombre pour leur prudence, comme sont les autres par hazard, ou par larrecin: ioinct, que le guerdon de uertu n'a rien commun avecq celuy de fortune. Item ne doibt le Courtisan dōner presents, ne les prendre de legier: pource que donner à qui ne merite, est faulte de solide iugement: & recepuoir de qui on ne doibt, chose uile. Qui ueult exercer liberalité, doibt cōsiderer ce, qu'il donne, & à qui il donne. Car ce seroit follie de donner ce, qu'on ne peult: ou ce, dont on a ne cēsité. Fault aussi cōsiderer le temps, & la saison, & la fin, pourquoy on dōne. Si le Courtisan donne quelque chose trop liberallemēt, & sans iuste cause de recompēse à celluy, qui est hors de credit, & en temps, qu'il commence à decliner, le don n'est il pas mal employé? N'est ce pas grād regret, qu'on donne plus tost au flatteur pour dire louanges fāmctes, au plaisant pour faire rire, au bien disant pour farder une mensonge, ou à ung inuenteur de nouuelles, qu'à ung fidele seruiteur, qui aura meritē guerdō toute sa uie? le n'en tends dire pourtant, ne dissuader aux grandz Seigneurs de dōner à plusieurs, & secourir à tous mais les seruiteurs doibuent estre preferēs, à occasion



casïo de ce, qu'on est mieulx aymé des seruiteurs pour les présents, qu'on leur faict, que pour les salaires, qu'on leur constitue. Quand on donne aux estrâgiers, & que les domesticques se uoyêt reculés, soyez assurez, que non seulement murmureront de ce, qu'ilz uoyrront dōner: mais aussi si par despit accuseront ce, qu'ilz uoyrrot faire: & de seruiteur on faict mortel ennemy. Les dons assubiectissent moult celluy, qui les repçoit. Des cē, que quelcun prend don d'aultruy, ung cheual, une robbe, ou qu'il mange souuent à sa table, il se oblige à luy porter faueur, à deffendre ses querelles, à luy faire cōpaignie, à suyure son party, & à aymer ce, qu'il ayme: & ueult la raison, que puis, que on sent du proffit d'aultruy, qu'on ne soyt ingrat: mais aussi, qu'on se garde d'estre si asseruy aux uoulūtes des aultres, qu'on oublie son propre honneur. Beaulcoup d'enfants de bonne maison uont en Court, & y portent une bōne partie de leur bien, & le consommet iouāt, gourmandant, & adulterāt, sous couleur d'apprendre leur entregents, allants aux maisons des grands, nō a aultre fin, si n'est pource, qu'on les y caresse, ou ilz y prennent ung gras repas.

de sorte, que cōme ieunes, uoyre bien ieunes, despendēt cheuance. & hōneur: puis quand la bourse est platte, font office de suyure tout le iour les rues, les Eglises, les palais, de demander nouuelles. Et tout cella pour racōpter escornisleries, & mēterie aux tables des seigneurs, & pour en auoir la lippée franche. Il est une maniere de ieunes à la Court, uoyre de bien barbus, lesquelz n'ont ny maistré ny adueu. Mais uenāt quelque estrangier incontinent s'abordent à luy: disants, qu'il luy ueullent monstrier les façons de uiure en Court, les congnoissances du palais, la mode de se garder des rusés, & la congnoissance des Dames. Et le paoure nouueau uenu, qui est encores sot, sera ce pendant affronté, tantost d'une robe, demain d'ung saye, l'autre iour d'ung cheual, & souuent de la bourse. Il est en Court une autre sorte d'hommes: lesquelz negociant avec si grand' authorité, & peu de sagacité, que depuis qu'il ont frequēté quelque seigneur, luy enuoyerōt ung paige, avec une lettre, disant, qu'ilz sont paoure gētil'hommes, parents de quelque grād Seigneur, & qu'ilz son là à la poursuyte de quelque estat: & qu'ilz ont à faire certain payement

Parquoy

Parquoy le supplient, qu'il leur ayde de deniers. Ce pendent la neceſſité n'est pas à leur endroit ſi grande, qu'avec le moyen de mentir ilz n'entre-  
 tiennēt ung cheual, & ung page, uoyre une ri-  
 baulde. Il eſt une aultre maniere d'affronteurs :  
 leſquelz depuis eſtre acagnardis aux palais, s'en  
 uont d'Egliſe en eglise, demandants pour Dieu,  
 diſants, qu'ilz ſont paoures plaideurs, & qu'ilz  
 ayment mieulx mendier, que deſrober, ſe recom-  
 mandants aux profnes des parroiſſes, & ſer-  
 mōs: & prennent cōtre raiſon, le bien deu aux pa-  
 ures. Il eſt auſſi une aultre ſorte d'affrōteurs, qui  
 uont parmy les maiſons des grāds, cōtreſaiſants  
 le bon ualet: careſſants tātōſt le maiſtre d'hoſtel,  
 tātōſt le deſpēſier, bouteillier, ou cuyſinier: &  
 uiuent du reſidu des tables: & ſi s'en uont les po-  
 ches, & māches pleines de uāde pour ſoupper.  
 Il en eſt une aultre ſorte, qui uont deux à deux,  
 trois à trois, à nuiēt ung, demain l'aultre pour  
 ueoir ſ'il y a rien de mal gardé: avec ce, q̄ ſi quele  
 que eſpée, cappe ou bourse ſ'eſgare, il en ſont  
 ung PRO NOBIS en groſſe note. Aultres en y  
 a, qui pour conduyre une putain, quād la Court  
 ſe remue, ou ſe dire Ruſiſques, uiuent du



graing de la miserable. Aultres à dez faulx, & cartes marquées pipent les innocents, & leur gagnent l'argent, & ilz y perdent l'ame. Il y a aussi des femmes à la Court, lesquelles, depuis que leur Aougst, & uendanges passent, seruent aux pecheurs de couuerture, trompent les chastes, subornent les mariées, importunent les uoyages, uendent filles, & à ce les nourrissent: dont s'ensuyt, que souuēt ces meschâtes font meilleur marché de ieunes garses, que ne font les poissonniers de lamproyes. Voyla doncq les cōpaignies de la Court, uoila les saintuaires, uoila la Religion, uoila les confrairies, uoila le desordre de la Court. Soit conclusion, uoyse à la Court, qui uouldra, & y reside, & triumphe, qui uouldra: que quant à moy, me souuenant, que suys Chrestien, & qu'il fault estre comptable du temps perdu, i'ayme trop mieulx labourer la terre hors la Court, & me sauluer, qu'estre chés le Roymal saint de conscience.

Qu'a

Qu'a la Court des Princes tous di-  
sent, nous ferons: & nulz,  
nous faisons.

Chapitre XII.

**B**las Philosophe de grand renommée  
entre les Grecqs, disoit ung iour au  
grand Roy Alexandre. *Quilibet in  
suo negotio hebetior est, quam in  
alieno:* Voulant dire, que chascun est commune-  
ment plus aucuglé en son propre faict, que à cel-  
luy d'aultruy, & disoit pour raison, qu'il y a des  
hommes en ce monde, lesquelz pour donner ung  
bon, & meur conseil, & pour remedier à ung  
affaire suruenu, ont des iugements, & des aduis  
plus que Heroïques, moyenant, que ce soit du  
faict d'aultruy. Et au leur n'ont ny saigesse pour  
gouuerner leur maison, ny sens rassis pour cou-  
rir leur misere. C. Cesar, Octavius Augustus,  
M. Antoine, Septimius Seuerus, Marc Aurelle,  
& aultres infins, furent estimés tant en leurs ne-  
gociés priués, comme au regime publique. Mais  
nous lisons, qu'ilz furent si negligets au gouuer-  
nement

nement de leurs maisons, femmes, & familles, qu'on le leur reprocha honteusement depuis. Tel est bon pour l'utilité publicque, qui ne uault rien à mesnager chés soy, & auroit besoing (si dire le fault) d'ung curateur. Plutarque racompte, que le tresfame capitaine Nycias iamais ne perdit bataille, que pour s'estre trop confié à son propre iugement. Si nous croyons Hiarcas le Philosophe, il est plus dommageable à ung hōme d'aymer son propre aduis, qu'une femme: pource, qu'en ayant la femme, on ne faict faulte, qu'à sa personne: & se trop confiant à soy mesmes, à toute la Republicque. Tout ce, que dist est, sera pour admonester ceulx, qui demeurēt en Court, de conuerser, & hanter les graues, doctes, & experimentés. Car la grauité apprend uertu, la science conduict, & l'experience la consomme. Pour saige, riche, fauorisé, que soit le Courtisan, il a besoing d'ung pere pour le conseiller, d'ung frere pour le persuader, d'une guyde, qui le mette en chemin, d'ung maistre, qui l'enseigne: & d'ung Precepteur, qui le chastie: pource, que les impostures, tromperies, & meschancetés sont à la Court si grandes, qu'il est impossible, qu'ung seul

Nycias

Hiarcas



seul les entende: tant s'en fault, qu'il s'en puisse  
 garder, ou y resister. Aux Cours n'a chemin plus  
 droict pour se perdre, que se uoloir gouverner *La Court*  
 par son propre aduis. La Court est ung perpe-  
 tuel songe, ung gouffre sans fonds, une phantasie  
 enchantée, & labyrinthe, ou ceulx, qui y entrêt,  
 se perdent, ou en sortent bien morfondus. Vng  
 des meilleurs apozimes, que puisse auoir le Cour-  
 tisan contre tant de maux, est, d'auoir ung fidele  
 amy, qui ne flatte rien: mais qui le corrige plus  
 tost, s'il se retire tard, s'il ua de nuict, s'il est  
 pipeur, ou deshonneste amoureux. Mais ou  
 prendrons nous cest amy? ueu que l'amitié  
 de la Court est deux, ou troys meschants  
 garniments, qui font ensemble monopoles,  
 ieux, desbauches, & batteries, & point cor-  
 riger l'ung l'autre: mais plus tost faciliter l'oc-  
 casion de mal faire. Parquoy doit celluy,  
 qui hante la Court, y auoir quelque amy  
 saige, avecq lequel il puisse sans craincte  
 communiquer de ses affaires, si que les aul-  
 tres luy soyent amys communs, & cestuy là  
 amy tres estroict. Je uouldrois aussi, qu'il se gar-  
 dast de conuerfer avecq seditieux, coleres, &  
 vagabonds:

uagabonds: car telle sorte de gens, luy diront, que le Roy ne paye point, que les fauorisés ont tout le bruyt, que les officiers sont trop graues, que les seruices sont mal recompésés, & que les bons sont mescongneus. Auec telles parolles, & semblables sont, que le pauvre Courtisan oublie à seruir, & apprend à murmurer. Ne doit aussi le bon Chrestien en Court laisser d'amender sa uie, pour espoir, qu'il ayt de uiure longuement: mesmement, que les plus uieulx se occupent plus à moyener nouueaulx passetēps, que à corriger les anciens pechés. Vous en uoyrez, qui promettēt tous les iours de meilliorer en leur uieillesse: lesquelz neantmoins meurent pires, que diables. La cause est, que chascun dict, nous ferons, & iamaïs, faisons. Il y a des uieillards, qui racompterōt les Roys, qu'ilz ont seruy, les Princes, qu'ilz ont ueu: les changements des offices: les guerres passées, & les sursaults, que fortune leur a fait prendre: qui nonobstāt tout ce, qu'ilz ont ueu, & enduré, sont aussi desireux de biens, & ieunes esbats, comme s'ilz ne commençoÿēt, qu'à uiure. Helas miserables: qui en perpetuelle angouisse: en continuel trauail & infinie passion, passent

passent depuis l'enfance (qui est iusques à quinze ans) la ieunesse, l'aage uirile, & la ueillesse, affin seulement d'augmenter leur bien, ou le renom de leurs maisons: sans penser, qu'en lieu d'ung uray, & bon repos: ilz se preparèt ung enfer de corps & d'ame. Ne doit aussi le Courtisan facilement se plaindre des aduersités, qui bien souuent luy suruiennent, en pensant, que nous nous plaignōs (chose partant de nostre uice) beaulcoup de foyz d'aulcunes choses, lesquelles se plaindroient de nous si elles auoyent langue. A l'heure, que l'hō me se uoyt bas en credit, paoure, oublié des riches, & descheu de ce, que le plus attendoit, incontinent mauulgrée fortune, & de plore son malheur. Ce pendant, ce n'est fortune, qui les a trouués: mais eulx mesmes, qui l'ōt cherchée, & trouuée. Tel pense soubdain estre riche, honoré, & estimé, qui se uoyant apres paoure, abbattu, & mesprise, ne scait se uenger sinon à dire, qu'il est malheureux au monde, que c'est sa desaduétude. Mais ce n'est, que sa follie pure, qui luy feit laisser l'ayse de sa maison, pour se preparer les hazards de fortune: & ne se peult douloir, que de soy mesmes, qui en print le chemin. Le mieulx est,



est, que depuis, qu'on y est, & on ueult perse-  
 uerer, qu'on dissimule: si on y ueult profiter,  
 qu'on s'efforce: si le plaisir y est, qu'on y demeu-  
 re: si desplaisir, qu'on s'en aille: uen que le mes-  
 contentement ne consiste pas au lieu, ou lon uit:  
 mais au cueur ambitieux, & esprit passionne. Te-  
 nez pour certain, Seigneur Courtisan, que pour  
 scauant, riche, & fauorisé, que soyez, s'il uous  
 aduient deux, ou troys choses prosperes, il en  
 uiendra cinquâte au rebours: ou (quoy, que soit)  
 à uoz amys. Car combien, que uoz *faciendes* se  
 despechent à souhait, restent souuēt celles de uo-  
 stre amy, ou compaignon. Dont s'ensuyt, qu'on  
 a plus de regret de ce, qui est nyé à l'amy, que de  
 plaisir de ce, qu'on a desia obtenu. Par ainsi tous  
 iours faulte de contentement. En uoulez uous  
 plus certain indice, qu'estant en Court, & hors  
 Court, uous n'oyrrez aultre propos, que, quel-  
 les nouuelles de Court? que faict le Roy? les Prin-  
 ces, les officiers: il est uray semblable, que qui de-  
 mande nouuelles, desire de ueoir nouveaultés, &  
 mutation de fortune: & se cuydent par ce moyen  
 là paoures enrichir, les riches commander, &  
 les plus grands dominer. O combien en est il, qui  
 uiuent

*faciendes*

uiuent en Court sousspirâts, & esperants, que le Roy les cōnoisse, que le fauorisé meure, ou que fortune se change, & qu'ilz paruiennēt. Et s'en fuyt, qu'en attendant, le temps les deçoyt, & la mort les empoigne au despourueu.

Que petit est le nombre des bons en  
Court, & grandes Repu-  
briques.

### Chapitre XIII.



**P**lutarque au Liure de l'exil, raconte le compte du grand Roy Ptolomée, *Ptolomee* qui ayant ung iour à son soupper sept Ambassadeurs de diuerses provinces, se meut propos entre luy, & eulx, sur la question, assçauoir laquelle estoit de leurs Republicques, qui se regissoit par meilleures Loix, ou coustumes. Lesdicts Ambassadeurs estoient des Rommains, Carthaginiens, Ciciliēs, Rhodiens, Atheniens, Lacedemoniens, & Cicioniēs: entre lesquelz fut la question deuāt le Roy affectueusement debatue: pource, que chascun *esprins*

esprins de l'amour de sa patrie, allegoit les plus  
saines raisons, qu'il pouuoit. Le bñ Roy desirāt  
sçauoir la uerité, & resolution de la question,  
commanda, que chascun desdicts Ambassadeurs  
dist troys conditions, loix, ou coustumes des meil  
leures, qui fut en sa Repub. Et que par ce moyen  
on uoirroit aysément, laquelle estoit la mieulx re  
gie, & meritoit plus de louange. Lors l'Ambassa  
deur des Rommains commença, & dist. A' Rom  
me sont les Temples honnorez, les gouuerneurs  
obeys, & les mauuais chasties. L'Ambassadeur  
des Carthaginiens dist. A' Carthaige les Nobles  
ne cessent de batailler. le commun de traualier,  
& les Philosophes d'enseigner. L'ambassadeur  
des Ceciliens dist. En Cecile se faict iustice, s'ay  
me uerité, & se prise equalité. L'ambassadeur  
des Rhodiens dist. A' Rhodes sont les uieux hon  
nestes, les ieunes uergogneux, & les femmes pai  
sibles. L'ambassadeur d'Athenes dist. A' Athe  
nes ne consentent, que les riches soient partiaulx  
ny le populaire oysif, ny les gouuerneurs igna  
res. L'ambassadeur des Lacedemoniens dist. A'  
Lacedemone ne regne enuie. pource, que tous y  
sont egaulx: ny auarice, pource, que tout y est cō  
mun:



num: ny oyſueteé, pource, que tous y trauaillét.  
L'ambassadeur des Cicioniens dist, A' Cicion ne  
reçoipuent eſtrangers inuenteurs de nouuelle-  
tés: ny medecins: qui tuent les ſains: ny aduocats,  
qui ſacent les procès immortels. Quand le Roy  
Ptolomée, & ceulx de ſa compaignie eurent ouy  
ces tant bonnes, & ſainctes obſeruations, loua-  
rent grâdemēt l'inſtitution de chaſcune: diſants,  
qu'ilz ne ſçauroyēt iuger, laquelle eſtoit la meil-  
leure. Ceſte hiſtoire eſt digne d'eſtre notée, &  
mieulx d'eſtre imitée. Si croyie, que ſi aultant  
d'Ambassadeurs ſe rencontroyent diſputants des  
Republicques d'aujourd'huy, ilz y trouueroyēt  
plus à uituperer (& ce ſans comparaiſon) qu'à  
louer. Au temps paſſé les maiſons Royales  
eſtoient tant reformées, les Roys tant iuſtes, les  
gouuerneurs tant meſurés, que les petites offen-  
ſes y eſtoient chaſtiées, & le penſer des gran-  
des, prohibé: affin que le chaſtiment fuſt terreur  
aux mauuais: & la prohibition aduis aux bons.  
Il n'eſt pas ainſi en noz Republicques, ou ſe font  
tant de mauix, & commettent tant d'atroces de-  
lictz. Et de malheur, ce, que les anciens chaſti-  
oyent pour mortel: maintenant nous diſſimulons

F pour

pour uenir: les truhants, & dissolus sont entre-  
tenus, tant s'ensault, qu'on les chasse. A la Court  
ma damoysele uesue, ou à marier, ou mal mariée  
qui uueille estre au seruice amoureux, ne trouue  
ra personne, qui luy die tu fays mal: mais plustost  
cinq cents, qui prochasseront son deshonneur.  
C'est le temps, sont les mœurs: mais les mœurs  
plus tost causent le mal: de sorte, que plus est à  
priser celluy, qui peut estre dict bon en noz Re  
publicques, que nul des Cōsulz Rommains: à rai  
son de ce, que anciennement estoit presque mon  
stre, trouuer ung mauuais entre cent bons. Et  
maintenant grand' aduventure, de trouuer ung  
bon entre cent mauuais. L'escripture Saincte  
loue Abraham, qui fut iuste en Caldée, Loth, qui  
fut iuste en Sodome, Daniel en Babylone, Tobie  
en Ninieue, & Neemias en Damasque. Voulants  
dire. que au Catalogue de ces Saincts hommes se  
peuent compter les iustes Courtisans, si aulcun  
en est, puis qu'il n'est personne, qui les anime à  
bien uiure, & beaucoup de gens leur sont guide  
à se perdre. A la Court a tant de uagabonds, de  
ioueurs, de blasphemateurs, & trōpeurs, qu'on  
nes'esbayt plus d'en ueoir tant: mais est nouveau  
d'ouyr

d'oyr parler d'aulture chose. Le monde n'a plus  
 en ses rosiers, que espines, en ses arbres, que fueil  
 les, en ses uignes, que labrusques pour rayfins, *Sir*  
 en ses greniers, que paille, & en ses thresors,  
 que Alcumie. O siecles dorés, ô siecles desirés, ô  
 siecles passés: la différence. que de uous à nous se  
 peult faire, est, que deuant uous le monde peu à  
 peu se perdoit: mais à present, il est du tout en  
 tout perdu. En toy ô mode chascun entreprend,  
 inuente, faict, commence, & paracheue ce, qu'il  
 ueult: & qui pis est, uit, comme il ueult: mais l'ys  
 sue en est tresdoubteuse. Il y a peu en toy ô mode  
 que attendre, peu que deffendre, peu que iouyr,  
 & biē petit, que garder: & d'aulture part beaul-  
 coup au contraire, que desirer, beaulcoup que  
 amender: & aussi beaulcoup, que pleurer.

Nox ancestres eurent le siecle ferré:  
 mais le nostre se peult hardiment  
 appeller boueux, pource, qu'il  
 nous tient en ung continuel  
 boubier, & tousiours  
 y sommes ords, &  
 maculés.



De beaulcoup de traualx de la Court,  
 & qu'il est de meilleurs Villageois,  
 que Courtisans.

Chapitre. XIII.



LE poëte Homere a escript les tra-  
 uaulx de Vlixes prince Grec: *Quin-  
 tus Curtius*, ceulx d'Alexandre, &  
 le Darius: Moyse, ceulx de Ioseph  
 en Egypte: a nuel, ceulx de Dauid, & Saul, Tite  
 Liue, ceulx des Rômainz: Thucidydes, ceulx de  
 Iason, avec le Minotaure: & Saluste, ceulx de Lu-  
 gurte, & Catiline. Voulant donc imiter, ces bõs  
 auteurs, i'entreprẽdray de escrire les ingrats  
 traualx, que passent les Courtisans de nostre  
 temps: lesquels ont patience asẽs, pour les endu-  
 rer, & point de sagesse pour s'en dẽffaire. Ce  
 n'est dẽcq sans cause, que i'appelle les traualx  
 de Court, traualx ingrats, si les Courtisans mes-  
 mes en souffrent tãt, sans en auoir fruiẽt aucun,  
 quilz y sont accoustumẽs, comme le uiel cheual  
 au bast, ou a la charrue. Quelcun me dira, que  
 e suis mal aduisẽ, de uouloir dire, que les Cour-  
 tisans

tisans ont mauuais temps: ueu que qui peult  
 aborder à ceste Court, se tiët pour bien fortuné.  
 Mais il s'abuse pensant que ceulx, qui sont hors  
 Court, soyët tous bestes, & ignares, & luy sça  
 uant: soyent rudes, & luy delicat: soyent uiles, et  
 luy honoré: soyent begues, & luy bien parlant.  
 S'il estoit ainsi, que Dieu uoulust, que les plus  
 parfaicts fussent à la Court, ce seroit à nous grā  
 disime faulte, de n'estre incontinent Courtisans,  
 sçaichans, qu'il n'est temps myeulx employé,  
 que celuy, qui se despart à ouyr les saiges, &  
 discrets. Quand tout est dict, les lieux ne mellio-  
 rent pas les hommes: mais plus tost les hommes,  
 les lieux. Dieu sçait (pour exemple) combien de  
 gentils, & bien bons espritz, labourent au Vil-  
 laige: & aussi combien de sotz, & bien estourdis  
 font des gros, & enflés au palais. Dieu sçait, cō-  
 bien de prudents, & rassis iugements se cachent  
 au Village: & combien de rudes engins, & foi-  
 bles ceruelles se manifestët en Court. Dieu sçait,  
 combië il y en a en Court, lesquelz cōbien, qu'ilz  
 ayent offices, dignités, estats, & préeminences,  
 ilz ne sçauroyent aux Villages (par maniere de  
 dire) à grand' peine estre Gouverneurs de dix  
 F 3 hommes.

hommes. Combien en sort il des Courts correcteurs des aultres, qui seroyent eulx mesmes corrigés au uillaige? O combien de choses se dient entre les laboureurs dignes d'estre notées? & combien deuant les Roys, dignes d'estre mocquées, O combien en est il en Court, qui se font ualoir, non pour estre honnestes, & diligents, mais pour estre en grand' auctorité, & combien en est il au uillaige oubliés, & rançonnés, plus par faulte de faueur, que de sagesse, & diligence. Les Princes donnent les offices: les fauorisés, l'entrée: nature, le bon sang: les peres, le patrimoine: les merites, l'honneur: mais estre discret, & saige prouient de Dieu seul, & ne peuent les hommes le despartir. Et s'il estoit ainsi, que les Princes peussent donner bon sens à qui en uouldroit, ilz en deussent prendre pour eulx mesmes, uen qu'ilz ne se perdent, que pour ne sçauoir rien. Je trouue de mauuaise grace, que d'aucuns uenants nouuellement de Court habiter au uillaige, sont des mocqueurs & ne treuuent rien à leur goust. Ce pédant uoyez leur façon de uiure, c'est coucher à mynuict, leuer à dix heures, demeurer à s'abiller iusques à mydy.



mydy, ou à se testonner, & mettre leur bōnet de trauers. Puis le demourant du iour, à parler de l'amy, qu'il auoyent en Court, ou de la bataille de Garillano, en laquelle ilz feirent merueilles. L'autre fera croire, qu'ilz estoit à la iournée de Pauie, avec le capitaine Antonio: ou à celle de Tume, avec l'Empereur: ou à celle de Corro avec Doria. Et pour tous potaiges, c'estoit ung bon maistre ruffian au zocodouer de Toledo, ou au Portro de Courdoua. Nous auons dist ce dessus pour aduiser, que mōsieur le mariolet ne se moque, & iase des Villageois: les estimants sotz, & lourdaux. Car ie croy fermement, que si mō maistre Cesar uouloit bannir de Court tous les ueaulx, & ignares, l'ay paour, qu'il demeureroit presque seul à sa Court. Disons doncques, que bien tard se recongnoissent ceulx de Court, en leur forme de uiure, & profession. Ie parle de la profession prouenant de la religion, qu'ilz obseruent estroittement: laquelle consiste en ce, qu'ilz promettent de complaire au diable, promettent à la Court de la contenter, & au monde de le suyure. Promettent d'estre sans cesse pensifz, tristes, & soupsonneux. Promettent de

tousiours traffiquer, negocier, importuner, requerrir, achepter, uendre, permuter, pleurer, pecher, & iamais de se reformer. Promettent aussi d'estre affames, rōpus, descirés, abbatués, endebtés, & mesprisés. Promettent de souffrir opprobres des Seigneurs, larrecins des uoyfins, iniures des coleres, mocqueries du populaires, reproches des parents, & finablement faulte d'amys. Voilà la profession, & reigle de l'obseruance des Courtisans. Que ie ne nommeray reigle: mais confusion: non ordre, mais desordre: non monastere, mais enfer: & les religieux nō freres, mais dissolus: non paoures d'hermitage, mais couuoiteux, mondains. O misere. O pitie. O faulte de iugemēt. L'oracle d'Apollo interrogué par les Ambassadeurs du peuple Rommain, ou gisoit le point de se bien regir, respondit à si bien congnostre sa portée, qu'on puisse renger les desirs, & tenir le frein roide aux appetits. Le Courtisan desirant tout, & en rien perseuerāt, pensera en son entendement, que si en ung an, qu'il aura demeuré en Court, il n'a estat, ou offices, ce n'est à faulte de sçauoir: mais (comme personne ignorante, & sotte) en increpera fortune

tune, & maulgréera l'heure, qu'il y uint : sans se recorder, que la Court est comme la Palme, qui a une brasse de racine soubz terre auant, que mōstrer au dehors deux doigts de fueille. Semblablement on est en seruice bien long temps sans estre pourueu, tant y a, que le perseuerer donne pour le moins confort à l'esperer. A la uerité dire, on uoyt, que s'il y en a trois, qui meritēt plus, qu'ilz n'ont, il en ya trois cents, qui ont plus, qu'ilz ne meritent. O quant petit de foys faict fortune ce, qu'elle doit. O quant de foys uault myeulx son hazard, que l'assurance de uertu, pource qu'elle mesure les merites de l'aulne d'opinion, non de raison. Elle faict brusler l'eau sans feu, couper le cousteau sans acier, allumer la chandelle sans flamme, mouldre le moulin sans eau : la raison en est l'incōstāce. Si elle rit à quelcun, c'est des oreilles, si elle pleure, il seroit mieulx n'estre iamais bougé de la maison : si elle esleue en hault quelcun, c'est pour le faire cheoir plus bas : si elle dissimule quelque temps c'est pour surprendre à l'emblée. Nul ne se fie doncques à fortune : car elle est tāt uariable, qu'elle ne tiēt promesse, qu'elle donne : ny escripture qu'elle fasse.



Qu'entre Courtisans ne se garde amy  
tié.ny loyaulté: & combien est  
la Court pleine de tra-  
uail, d'enuyē, &  
rancune.

Chapitre

XV.



Ng des plus excessifz trauaulx, qui  
soit entre Courtisans, est, que nul  
ny reside, qui ne soit hay, ou qui ne  
haïsse aultruy, qui ne soit poursui-  
uy: ou qui ne poursuyue, qui ne se mocque, ou  
qui ne soit mocqué. Malheureuse chose: beau-  
coup de gens, uous y osteront le bonnet, qui uous  
uouldroyent auoir osté la teste, & tel uous fait  
la reuerence, qui uouldroyt s'estre rompu la iam-  
be à uous porter en terre. N'est ce pas pitie de  
conuerser tous les iours ensemble, de rire, de  
gaudir, & au cueur auoir innymitié mortelles?  
N'est ce pas trop dissimulé, que d'honorer ce-  
luy, qu'on uouldroit ueoir mener au gibet? Le  
tout pour une ambition, & trop aspre espoir de  
fortune, & faulte de sçauoir ce, que l'amytié biē  
obseruée uault à moderer l'homme. Quelle uie,  
quelle

quelle fortune, quel goust peult prendre celuy,  
 qui se ueoit iournellement chés les princes entre-  
 tant de larrons, meurtries, empoisonneurs, &  
 meschants trahy, & uendu? Au contraire quelle  
 felicite, d'auoir à qui on puisse fidellement se re-  
 créer, ne craignant personne? A ceste Court il  
 y a des gentils hommes si encharnés à uengean-  
 ces, & malueillance, que par moyens, ne requie-  
 ste, qu'on leur fasse, on ne les peult dinertir de  
 leurs mauuaises intentions: qui sont contents  
 de mettre guerre dedans leurs maisons, pour  
 chasser paix de celles de leurs ennemys. Par ainsi  
 presupposé ce, que dessus, on ne peult gueres  
 esperer des amys à la Court, & moins s'y fier:  
 car tant plus on y est grand, tant plus y a, que  
 craindre. Qui cause tel travail, que ie m'esbair,  
 comment on a force pour le supporter, &  
 cueur pour le dissimuler. O que le uillageois  
 est heureux, & ayse, avec sa mediocre sollici-  
 tude de son petit domaine, au pris du Courti-  
 san, (l'estat duquel est tousiours malheureux,  
 & du tout miserable) qui ne cesse d'esperer  
 choses uaines, & de procurer iniustes, & inde-  
 terminées. Si ses pëcées estoient uent, & ses des-  
 sirs

· sirs eues, il seroit plus grand dangier nauiguer en son cueur, qu'en haulte mer. La Court a tousiours ung ie ne sçay quoy, ung ie ne sçay comment, & ung ie ne l'entends: qui cause, que incessamment on s'y plainct, incessamment on s'y altere, & incessamment on s'y despitte: & avec ce ne nous donne iamais licence de nous en aller. Le ioug de la Court est dur, les liens serrés, & la charue si fascheuse, que ceulx, qui y pensent triompher, sont les premiers, qui y labourent, & trainent les pesants fardeaux. Et les paoures mal aduisés endurent ces intollerables trauaulx, affin de n'estre en leurs pais subiects, & pour auoir plus grād' liberté de mal faire. Dieu sçait, combien leur coste ceste liberté, laquelle pour une uolupté momentanée engendre continuel trauail, & perpetuelle seruitude. La propriété de celle uitieuse liberté, ou a mieulx dire, subiection est, que au commencer semble saoureuse: mais à la parfin tout se reduit en amertume, & regret, quand se uient à experimenter par le menu la façon du uice. Car si c'est avec femmes, il les fault flatter, seruir, & requerir: & si monnoye fault, on donne au diable la marchandise. Des ce, que  
quelcun



quelcun uient nouuellement en Court, madame la gorriere luy donne ung traict d'œil, l'entre-  
tient, le caresse, l'acolle, & puis le uoyant bas de  
poil l'enuoye paistre aux champs. Si le uice est au  
manger, le Courtisan prend souuent son repas  
avec tel, qui le uouldroit auoir mägé sans saulce.  
Si le uice est au ieu, semblablement n'y a aucun  
goust: car s'il gaigne, il fault, qu'il desparte du  
gaing aux assistants, s'il perd, on ne luy restitue  
ung seul denier. Si le uice cōsiste à iaser, & moc-  
quer, il n'y a aussi proffit: pource, que les bro-  
cards de Court commencent en parolles, &  
finissent en iniures, & batteries. Aultant  
en est il des aultres especes de uices,  
comme des susdictz. Prenons conclu-  
sion, que par tout a des affaires  
bien grāds. Et qu'il n'est  
rien pire, qu'ung Cour-  
tisan esuenté, & ung  
uillageois oyfif.

De

De combien souloyent estre plus cor-  
 rtes les Republicques, & Courts  
 du temps passé, que celles  
 de maintenant.

Chapitre XVI.

**L**E Roy Anchises lamentoit la de-  
 struction de la superbe Troye, fai-  
 te par les Princes de Grece. La  
 Royne Rosane plaignoit son mary  
 Darius, quand fut uaincu par Alexādre le grād.  
 Hieremias pleuroit l'estat de la Repub, de Babi-  
 loine, quād il fut rendue captiue. Le Roy David re-  
 grettoit son filz Absalon, quand ioab le tua. La  
 Dame Cleopatra cuyda mourir de dueil, quand  
 son bien aimé M. Antoine fut uaincu par l'Em-  
 pereur Auguste. Le Consul M. Marcellus lamen-  
 toit la cité de Syracuse, quād il la uoyoit brusler.  
 Saluste Romme mal gouuernée. Le patriarche  
 Iacob son filz Ioseph. Le Roy Demetrius son  
 bon pere Antigonius, quand le trouua mort à la  
 bataille de Marathone. Bien seroit raison, que  
 avec ces tant renommés Princes deplomissions les  
 calamites

*Cleopatra*

*Cleopatra*

calamites de nostre temps, auquel uoyons tant de choses merueilleuses, que les curieux auteurs du tēps passe n'en escripuēt point de semblables ne les hōmes ueirent de parolles. Vray est, que de ce temps les Chroniqueurs escripuoyēt tout ce, qu'ilz uouloyent: maintenant on ne l'ose à peine dire. Le philosophe Ariminius a escript de l'abondance d'Egypte: Demophon la fertilité d'Arabie: Tucidydes des thresors de Tyrus: Asclepius des mines d'Europe: Dodrillus les louanges de Grece: Leonidas les triumphes de Thebes: Eumenides du gouuernement d'Athenes: Thesiphontes de l'ordre, qu'on tenoit en Court & aux premieres maisons des Sicioniēs: Pitheas du profit du peu parler des disciples de Socrates: Apollonius, de la contenance, & abstinence, qu'on gardoit à l'Academie du diuin Platon: Myronides, du grand exercice, & peu de repos de la maison de Hiarcas: Aulus Gellius, du peu manger, & dormir des disciples de son precepteur Fauorinus. Plutarque des saiges femmes de Grèce, & des chastes de Romme. Diosdorus, comment ceulx des Isles Baleares gectoyent leurs thresors dans la mer, de paour,

que



que les estrangiers, par auarice ne leur fissent la guerre, & qu'ilz n'eussent entre eulx partialités. Ouy doncq tout ce, qu'auons racompté, ie demande au lecteur, à son aduis, que doibt escrire ma plume de nostre tēps ? Si nous escripuons de la bonté, & uerité, nous mentirōs, Si de l'abondance, les hommes ne sont, que faim, & auarice. Comment louerōs nous nostre Siecle d'hommes hardis aux armes, & sçauants aux lettres, ueu que les espritz ne s'employent, qu'à desfrober, & tromper ? Comment le louerons nous, de prosperité, & santé, ueu que la peste, & uerolle, se sont faictes plus, que domesticques ? Comment le louerons nous de continence, & abstinence, ueu que à peine en cinquante ans on ieune ung Carême ? Cōment le louerons nous de peu de repos, & beaulcoup d'exercice puis qu'il est plus grand nombre de ceulx, qui se reposent, & desrobent, que de ceulx, qui travaillent, & sont loyaux ? Comment le louerons nous de peu manger, puis que aujourd'huy le uentre est le Dieu des hōmes ? Comment le louerons nous de femmes chastes, & loyalles, puis qu'il n'est rien plus commun, que l'adultere ? Comme le louerōs nous  
de

de n'estre conuoyteux, puis qu'on ne cherche seulement l'or, & l'argent aux mines: mais le uoion querir iusques aux Indes? De uigne tât gelée, d'arbre tant sec, de fruit tant uerd, d'eau tant trouble, de pain si mal cuit, d'or tant faulx, & de siecle tant soupçonneux, que pouuont nous esperer, que mal? Lisons ce, qui est escript des Courts des Princes d'Assyrie, de Perse, de Macedoine, de Grece, & de Romme: & le conferos aux nostres, on uoyrra de telz maulx, & uitieuses coustumes aux Republicques de maintenant, que les anciens n'eussent sceu commettre, ny inuenter. En ces heureux temps passés, & siecles dorés, ung mal conditionné ne se osoit trouuer en bonne compagnie. Mais maintenant (ha douleur) est tant commune la dissolution, & corruption, que c'est peu d'estre mauuais, si on n'auoit perdu du tout en tout honte. Les Courtisans ne menyeront point, que ce temps pendant, qu'ilz attendent au palais le leuer du Roy, qu'ilz ne se entreracomptent les ungs aux aultres, tout cela, que la nuit deuant ilz ont entrepris: comme ilz ont ioué, iuré: plus, les risées de la cōpaignie des bōnes Dames, qui y estoyēt, les belles, les miculx

G parées

parées, & quelque fois celles, qu'ilz ont adul-  
 terées. Comme le monde est nouveau, aussi sont  
 les inuentions nouvelles, ieux nouueaulx, habits  
 nouueaulx, parler affecté, & nouuelle mode d'af-  
 fronter. Chascun an, chascun moys, mais chascun  
 iour, & à toute heure on uoit les uices se dilater  
 & la uertu diminuer: à raison de ce, que la uertu  
 a en Court mille contredisans: & le uice innu-  
 merables fauteurs. Si en Court s'introduict une  
 louable coustume, elle n'est pas si tost uenue,  
 qu'elle est chassée: au contraire, le uice si tost ap-  
 perceu, qu'il est & receu, & entretenu. Le legis-  
 lateur Ligurgus, deffendoit par ses loix tresex-  
 pressément, que les estrangiers, n'entrassent en  
 sa Reub. & que ses Citoyens ne frequentassent  
 ailleurs: affin, comme il disoit, qu'en traffiquant  
 n'appriussent les uices d'aultruy, & barbares  
 conditions. Au temps que M. Portius estoit Con-  
 sul, uint ung excellēt Musicien, de Grece à Rom-  
 me, grand ioueur d'instruments: lequel, pource  
 qu'il adiousta à sa Harpe une corde plus, qu'on  
 n'auoit de coustume de ueoir aux aultres, fut  
 par le consentement du peuple banny, & son  
 instrument bruslé. Nostre siecle endureroit  
 asses

*Lycourus en  
 Laodemon*

*Portius*



asses la musique, & ne s'arresteroit à ce,  
 que la Harpe eust trop cordes : mais qu'il y  
 eust hommes cordés, & rassis. Plutarque *Plutarque*  
 dit, qu'il ueit une fois à Romme lapider, à  
 la grand' place de Campus Martius, ung preb=  
 stre Grec, pour auoir sacrifié à la déesse Be=  
 recinthe en aultre mode, que laccoustumée.  
 Suetonius afferme, que en quatre cents, & *Suetonius*  
 soixante quatre ans, que dura le Temple des  
 Vierges uestales, ne s'en trouua oncques, que  
 quatre de mauuaise uie, Domitia, Rhea,  
 Albina, & Cornelia, qui furent publicquement  
 uiues ensepuelies. Si aujourd'huy on faisoit  
 ung catalogue des semblables pour les pu=  
 nir, ie uous laisse penser, que les bourreaux  
 n'y scauroyent fournir. Trebellius Publius *Trebellius*  
 dict, que l'Empereur Aurelianus Quintus  
 priua ung sien grand amy de l'office de Di=  
 ctateur, qui se nommoit Rogerius, pour ce,  
 qu'il auoit dancé aux nopces de Postoria  
 Auia sa uoysine, disant, que le bon Iuge ne  
 debuoit abandonner sa grauité iusques là, que de  
 semesler de choses uiles, & populaires. Si est  
 ce, que ( quoy, que dye cest Empereur ) à  
 G 2 present

present nous donnerons licence à noz Iuges de remuer en dance tant qu'ilz uouldrôt les piedz, mais que leurs mains ne bougent. Il ne chault au paoure plaideur, si son Iuge balle, ou dance, mais qu'il luy fasse bonne, & briefue iustice: ce qui n'aduiant souuent. Il faudroit en cest endroit resusciter l'Empereur Domitian, lequel comme dict Suetone, feit edict, que quiconque prorogeroit les proces plus d'ung an, fust à iamais banny de Romme. si ceste sainte loy eust duré iusque à present, il fust en Romme, & allieurs plus de bannis, que de citoyens.

De beaucoup d'illustres hommes, qui laisserent les Courts, & grands cités, & se retirarent en leurs maisons  
plus par voulunté,  
que par necessité.

Chapitre

XVII



Arcus Crassus capitaine Romain, fust grandement loué de ce, qu'il estoit uailant à la guerre, & saige aux affaires domesticques. C'est

ce

ce Crassus, qui suyuit la partialité de Sylla Consul, contre Marius, & Iulius Cesar, lors dictateur, Aduint une foys, que par fortune de Mer, le dict Cesar fut prisonnier des Pyrates, & Cour *Cesar* saires, & dist tout hault à deux, ou troys des principaulx, qui le tenoyent lié: Il me poise fort, non de ce, que suys prins ( puis que c'est hazard de guerre ) mais du plaisir, qu'en aura mon ennemy Crassus. quand scaura les nouuelles, De ce Crassus fut precepteur ung Philosophe nommé Alexandrius, qui le gouuernoit comme pere, le *Alexandrius* conseilloit cōme amy, & l'enseignoit cōme maître: & ce par l'espace de dixhuit ans: lesquelz Passés, demanda congé pour se retirer à sa maison: & s'en allant dist, ces parolles à Crassus. Ie ne te demande pour salaire de mes peines, & guerdon de t'auoir endoctriné, aultre chose: si ce n'est, quil te plaise me faire ce bien, que ie ne retourne iamais en ceste Court, & que me uoyāt retiré, ne m'escripues iamais de tes negociés: pource que ie suis si las d'estre Courtisan, que ie ne ueulz seulemēt laisser la Court: mais l'oublier du tout. Dionysius siracusanus, cōbien qu'il fust cruel tyran, si fut il nonobstant grand amy des



Philosophes, & admirateur des saiges. Il disoit, qu'il prenoit plaisir d'ouyr parler les saiges de Grece, mais non les croire, pource, que leurs enseignements n'estoyent, que parolles sans faict. Huiet des plus sçauants de Grece uindrent en Syracuse, uille, ou ledist Dionysius faisoit sa residence, asçauoir Platon, Chilo, Demophon, Diogenes, Myrtho, Pillades, & Surranus. Lesquelz se mesloyent plus des affaires de Dionysius, qu'il ne faisoit de leur doctrine. Diogenes demeura unze ans avec luy, puis s'en retourna en son païs, ou estant, & lauuant chés soy des herbes pour manger, ung aultre Philosophe se iasant luy dict: Si tu n'eusses laissé le seruice de Dionysius, tu ne fusses maintenant en peine de lauer toy mesmes tes herbes. Aussi dist Diogenes. Si tu te fusses contenté de lauer, & manger herbes, tu ne fusses pas à ceste heure en la Court de Dionysius. Cato Censorius, duquel prirent nom les aultres Catons, fut estimé l'ung des plus saiges de Romme. Et ne le ueit on, en soixante, & huiet ans, qu'il uesquit, rire une seule foys, ne faire chose quelconque contraire, ou repugnante à sa grauité. Plutarque dict, qu'il fut

Diogenes

Cato censorius

en parler prudent, en conuersation doulx, au  
 corriger seuer, en presents liberal, au manger  
 sobre, & en ce, qu'il promettoit, certain, &  
 avec ce en iustice inexorable. Il laissa semblable-  
 ment la Court Romaine, en l'age de cinquante  
 cinq ans, & se retira à ung petit Villaige près  
 Picene, ou est à present Puzol: & illec passa le  
 residu de ses ans en repos, accompagné seule-  
 ment de Liures, & ayant pour singuliere recrea-  
 tion d'aller deux, ou troys foys du iour ueoir la  
 campagne, ou les uignes, & y trauailler quelc-  
 que foys. Vng iour ainsi, qu'il estoit absent,  
 quelcqu'ung escripuit avecq du charbon à la  
 porte de sa maisonnette. O felix Cato, tu solus  
 scis uiuere. O bienheureux Caton toy seul as  
 choysi la bonne façon de uiure. Lucullus *Lucullus*  
 Consul, & Capitaine Romain tresuailant  
 mist à fin la guerre contre les Parthes, laquelle *La guerre des*  
 auoit bien duré seize ans, ou il acquist de grands *partages*  
 honneurs pour la cité de Romme, renommée  
 immortelle pour soy, & grandes richesses  
 pour sa maison. On dict de luy, qu'il a esté seul  
 des capitaines Romains, qui a iouy paisible-  
 ment sur sa uieillesse du bien, qu'il auoit gagné

ieune à la guerre. Despuis que ce Luculus uint d'Asie, & ueit, que la Repub. estoit troublée, de ceulx de la faction de Sylla, contre Marius, delibera de laisser Romme, & faire une maison aux champs, près de Naples sur la mer, en ung lieu appellé de present, le Chasteau de Lobo: ce qu'il feit, & y demeura bien dixhuyt ans, en grand trā quillité. Sa maison estoit frequentée de beaucoup de gens, mesmement de la plus part des Capitaines, qui alloient en Asie, & des Ambassades, qui uenoient de Romme, lesquelz il recepuoit humainement, & liberallement. Vng soir, que ses seruiteurs luy auoyent appresté à soupper, à moins d'appareil, que de coustumes, soy excusants de ce, qu'il n'auoit aucun estrangier, leur dist: Encores qu'il n'y ait seans hostes, ne scauiez uous pas bien, que Lucullus debuoit soupper avecques Lucullus? Plutarque parlant des exercices, qu'il faisoit depuis, qu'il fut retiré au lieu sus dict, dist, qu'il ayroit fort la chasse, & uolerie: mais sur tout, se delectoit d'estre à sa Bibliothecque, lisant, ou disputant incessamment. Helius Spartianus dict, que Diocletian apres auoir gouuerné l'Empire dixhuiet ans, le laissa, & se retira

Helius Spartianus  
1184



retira aux champs, pour passer le residu de sa  
 uie en paix, & repos, disant, qu'il estoit temps  
 de laisser l'estat dangereux de Court pour pren-  
 dre le pacifique du Villaige. Deux ans apres,  
 qu'il se fut retiré, les Rommains luy enuoyarent  
 une solênelle Ambassade, par laquelle le prioyêt  
 affectueusemēt, qu'il eust pitié de la Republic-  
 que, & que son plaisir fut de retourner, luy pro-  
 mettans, que tant, qu'ilz uiuroyent, aultre, que  
 luy, n'auroit nom d'Empereur. Quand l'Ambas-  
 sade arriua à la maison, ou il se tenoit, le trouua  
 en ung petit iardin, ou il escartoit des laictues,  
 & plantoit des oignons: lequel auoir ouy ce,  
 qu'il uouloit dire, respondit. Ne uous semble il  
 pas, mes amys, qu'il uault mieulx à celluy, qui a  
 planté ces laictues, arrousées, & entretenues,  
 les manger ioyeusement, que retourner entre les  
 seditiōs de la Republicque? I'ay essayé, que uault  
 le commander à la Court: & le labourer au Vila-  
 laige: laissez moy icy en patiēce: car i'ayme trop  
 mieulx uiure icy du trauail de mes mains, que  
 estre en sollicitude à l'Empire. Notez, de com-  
 bien est plus heureux ung laboureur, qu'ung  
 Prince, par cest Imperial exemple. Cleo, &

*Pericles*

Pericles succedarent au faict du Regime publicque à Solon, homme docte, & bien estimé entre les Grecz demy Dieu, pour raison des Loix qu'il establit à Athenes. Ces deux illustres Gouverneurs furent fort aymés, pource que (comme racompte Plutarque) Pericles en trête sis ans, qu'il eut l'administration des affaires de la uille, on ne le ueit oncques entrer en maisõ d'aultruy, ny s'asseoir en place publicque avec le menu peuple, tant estoit en reputation graue. Sur l'aage de soixante ans il se retira d'Athenes, à ung petit Village, ou il paracheua le demeurant de sa uie, estudiant & passant son temps à l'agriculture. En sa maison auoit une petite portè estroictte: au dessus de laquelle estoit escript.

Inueni portum: spes, & fortuna ualete.

*Lucius Seneca*

Voulant dire, puis que l'ay maintenant (& ce apres cõgnoissance de uanité) trouué le port de repos, sy d'esperance, & de fortune. De cest exemple se peult noter, que nul Courtijan ne peult dire, qu'il meime uie seure, si ce n'est depuis, qu'il se retire chés soy. Lucius Seneca fut directeur en bonnes mœurs. & instructeur en bonnes

bonnes lettres de Nero sixiesme Empereur de Nero <sup>vi<sup>e</sup> empereur</sup>

Romme, avecq lequel il demoura uingt, & quatre ans, & eut grands maniements d'affaires publiques, & priués, pource, qu'il estoit discret, & bien experimenté. Sur sa uieillesse fâché d'estre en continuel conflict de negoces, laissa la Court, & alla demeurer à ung sien domaine pres de Nole de Campanie, ou il uesquit encores longuement, tesmoings les Liures de officijs, de Ira, de Bono uiro, & de Aduersa fortuna, qu'il escripuit lors. A la parfin (faisant fortune, & malice humaine son office) Nero son disciple, le commanda tuer, non pource, qu'il eust commis crime digne de mort, ou fait chose indigne d'ung honnestre homme: mais pource, que l'impudique Domitia luy uouloit mal. Note Le <sup>Domitia</sup> Lecteur de cest exemple, que fortune poursuyt aulcunes foys le retiré à sa maison, comme le Courtisan. Scipio Aphricanus fut estimé tel à Romme, qu'en uingt & deux ans, qu'il feit la guerre en Asie, Aphricque, & Hespaigne, iamais ne perdit bataille, ne feist chose, dont il peulst auoir reproche. Et si gaigna Aphricque, mist à sac Carthaige



thaige, subiugua Numance, uainquit Hannibal,  
 & restaura Romme affoyblie de la perte de  
 Cannes. En l'aage de cinquante deux ans il se re-  
 tira de la Court Rommaine à ung petit Villai-  
 ge entre Puzol, & Capue, ou il print la uie solitaire  
 si tres à gré, qu'en unze ans, qu'il y demeura, id-  
 mais n'entra ny à Romme, ny à Capue, Platon le  
 diuin nasquit en Licaonie, fut nourry en Egypte:  
 & despuis estudia à Athenes: on lit de luy, qu'il  
 respondit aux Ambassadeurs de Cyrene, qui luy  
 demandoyent loix pour se regir en bonne, &  
 seure paix. *Difficillimum est homines amplifi-  
 ma fortuna ditatos legibus continere.* Il est mal  
 aysé d'asubiectionner les riches à la rigueur de la  
 Loy. A propos ne pouuant Platon supporter  
 l'importunité de ses amys, ne la crierie du peu-  
 ple, s'en alla demeurer à ung Villai-  
 ge d'Athenes nommé Academie, auquel le bon  
 uieillard, apres y auoir demeuré quatorze ans,  
 enseignant, & escripuant fina ses felices iours.  
 Despuis en memoire de luy, les anciens appela-  
 loient ledict Villai-ge Academie, qui ueult dire  
 en latin escholle, Conclusion, que tous les sus-  
 ditz illustres Princes & saiges homes laissarent  
 monar

Plato

L'Academie de  
 plato

monarchies, royaumes, cités, & grandes richesses, & s'en allarent aux uillaiges chercher une honneste paoureté, & paisible uie. Non que ie uueille dire, qu'aucun d'eulx laissast la Court, pour y estre paouure mesprisé ou banny: mais de leur franc arbitre uoulurent remedier à leur uie auant que mourir;

L'autheur se plaint avec grand' raison des ans, qu'il a perdus en la Court.

Chapitre XVIII.



Oymesmes à moymesmes ueulx de-  
mander à ma uie, compte de ma uie,  
affin que conseruant les ans aux tra-  
uaux, & les traualx aux ans uoyët  
& congnoissent tous, cōbien de temps a, que  
laiday à uiure, & cōmençay à mourir. Ma uie  
( Lecteur ) n'a pas esté uie, mais prolixie mort:  
mes iours, ung ieu à refaire: mes ans, ung songe  
fâcheux: mes plaisirs, scorpiōs: ma ieunesse ung  
sommeil transitoire. Ma prosperité, n'a esté pro-  
sperité: mais proprement ung chasteau en pain-  
cture,

Etur, & ung thresor d'alcumie. Ie hantay la Court fort ieune, ou ie ueis beaulcoup de fortunes, de diuersités d'offices, & d'autres mutatiōs mesmement chés les Princes, que ie seruoys, & y essaïay, que c'estoit de trauail par mer, & par terre. Et en fūt ma recōpense trop plus grande, que ne meritois. Mais si est ce, que ie m'y suys ueu aucunes foys en grace, & d'autres hors grace: i'ay expérimenté des surfaulx des destinées: i'ay eu en Court des amys, des ennemys: i'ay ouy des faulx rapports: i'ay esté tantost allegre, puis triste: huy riche, demain paoure: remonte, & tout soubdain abbatu. S'a esté une mōmerie, ou i'ay perdu & argent, & temps. Puis quoy? Que eustes uous de ceste grande iournée, ô mō ame? La recompense, que i'en eu, fūt, que i'en rappor tay la test grise: les piedz pleins de goutte, la bouche esdentée, les rains pleins de grauelle, mon bien impignoré, le corps chargé de pensements, & mon ame non guieres nette de peché. Encorès y a il plus, puis que dire le fault: c'est, que i'en retournay mon corps tant fatigué, mon iugement tant hebeté, tout mon temps perdu, le meilleur de mon aage passé, & qui pis est, ie ne prends



prends goust aulcun en chose du monde, & suis de moy mesmes plus, que de tout cella mescōtent. Que dirayie, des altercations de ma uie, & des changements de la fortune? P'allay à la Court innocent, & en reuins malitieux: i'y allay ueritable, & retournay menteur, i'y allay humble, & reuins presumptueux, i'y allay sobre, & retournay gourmand: i'y allay humain, & men retournay inconuersable. Finablement ie m'y gastay de tous poincts. Et ne fault, que i'en attribue la coulpe à mes maistres, Car les uices s'apprennent assés sans precepteur, & ne se peuuent oublier sans chastieur. O miserable, ie tenois à la Court compte de mon bien, pour sçauoir, comme il se gastoit, & non pour en distribuer aux indigents: ie tenois compte de mon honneur pour l'augmenter: & non pour le melliorer du temps pour proffiter en richesses, non en uertu. Ie tenois compte du payeur, pour sçauoir ce, qu'il me debuoit, & non avec l'indigent, pour ueoir, si ie luy pourrois ayder: ie tenois compte avec mes seruiteurs affin, que ie sceusse comment ilz me seruoient non comme ilz uiuoient. Ie tenois compte de ma uie plus  
pour

pour la conseruer, que pour la corriger. Voyla  
mō compte, uoyla le calcule, uoyla l'arithmetic=  
que au rebours. Allons plus auant, & uoyons  
mes exercices. Iamais ne fus en Court, que ne  
trouuasse, à qui porter enuye. Iamais ne fus au  
palais, que ne trouuasse une fenestre pour regar  
der, & ung Courtisan, pour murmurer. Iamais  
ne parlois aux Princes, que ne m'en allasse mal  
content de quelque responce. Iamais ne m'allay  
coucher, sans me plaindre, ne m'esueillay sans  
souffrir. Iamais ne fus en maison, qui me agreast  
ny en lieu, qui me contentast. Iamais ne me uey en  
lieu content, ne près d'une iournée de là. Si ie uou  
lois faire aucun bien, mes frais excessifz me di  
foient le cōtraire. Si ie uoulois estudier, mes com  
paignons suruenoyent. Si prendre quelque heu  
re liberale à passetemps, les negoces m'assail  
loyēt, Si me retirer de Court, les debtes, & auar  
rice, m'empeschoyent. Si me cachois une heure  
seul, les pensements me martyrisoyent. Finable  
ment iamais n'estois sans plus de fâcherie au  
cueur, que d'argent à la bourse. Encores est ce  
peu, ayant esgard à ce, que tousiours portois en  
uye à mes egaulx, flattois les superieurs, & n'a  
uois

uois pitié des moindres. I'auois fantasie d'aymer  
 quelcques ungs, & d'auoir maluueillance pres-  
 que à tous. Ie trouuoys à tous, que reprendre:  
 & contre moy ne pouuois souffrir une seule pa-  
 rolle. O cōbien de fōys me suys esgaré moy mes-  
 mes, iusques à m'oublier le mourceau à la bou-  
 che, & parler seul à haulte uoix, comme ung  
 homme hors du sens. O combien de fōys m'est ad-  
 uenu, que sortant du conseil lassé, ou du palais fa-  
 sché, ie ne uouloys ouyr mes seruiteurs, ny despe-  
 cher ceulx, qui auoyent affaire à moy. O com-  
 bien de fōys me suis ueu tant desgousté, que ie ne  
 sçauois, que uoulois, encores qu'on me le donast:  
 & si ne sçauois moderer ma fischerie, encores  
 qu'on me consolast. Helas combien de fōys m'a  
 pressé l'enuie de laisser la Court, & le monde, &  
 m'en aller rendre en quelque desert Hermite,  
 pource, que le Roy aduançoit quelcqu'ung, &  
 ie demeuroid en arriere, demy desesperé. D'ad-  
 uantaige pour le comble de mes traualx, tous-  
 iours alloys demandant nouuelles des affaires  
 de la Court. Tousiours pensois, que me pour-  
 roit aduenir. Tousiours escoutois, qu'on disoit  
 des aultres, tousiours allois sentant, tousiours

H

escoutant:



escoutât: & tout considéré ie trouuois par mon  
cōpte, qu'en grand' captiuité, & tristesse ie me  
damnois. Passons oultre. Si i'estois riche, on ne  
cherchoit, que moyen de me deuorer. Si i'estois  
paoure, on ne me secouroit, les amys m'importu  
noient, & les ennemys me procuroient la mort.  
Le trop caqueter me rōpoit les oreilles, le taire  
m'an dormoit, la solitude me rendoit triste, & le  
trop de compaignie importū, le trop d'exercice  
me lassoit, & l'oysieté me damnoit. Cōclusion,  
que ie me feschay, & desgoustay en Court, de  
telle sorte, que ie n'osois soubhaier la mort, &  
si ne prenois plaisir à uiure.

L'autheur compte les uertus, qu'il per-  
dit en Court, & les mauuaises  
coustumes, qu'il y aprint.

Chapitre. XIX.



Ais quoy? ma fortune passa, mes  
amys moururent, mes forces se ab-  
baissarent, ma uie declina, & mes  
premiersaults faillirent. O que si  
tout du tout se fūt achuë, qu'il eust esté beau-  
coup

coup-myeulx pour moy. Mais tout resolu, ie me plains singulieremēt du traistre cueur qui ne cessa oncques de desirer choses uaines, & la maudite langue de dire parolles detractiues. Amy lecteur, ne soys fasché, si ie dy en peu de langaige la difference, d'entre celluy, qu'estois, quād allay en Court: & celuy, que fus, despuis en-estre reue nu. Premièrement, au parauant, que me getter au labyrinthe de ceste chimere de Court i'estois religieux bien moriginé, & craintif. Et depuis i'ay aprins à estre meschant, paresseux, & dissolu, & non guieres soucieux des aduātages de mon ame. I'y allay ieune, & disposé, & en reuins en l'ouye sourd, & la ueue lousche, & au cheminer boiteux, au manier gouteux, au trauailler debile, grison, uieil, & tout plein d'ambition: de sorte, que i'estois tant uariable, que ne sçauois, ou ficher pied, & fondemant. Mon cueur estoit de si deprauée sorte. qu'en toutes actions taschoit à estre deschargé, & par tout trouuoit peril, & tourment. Ie proposois aulcunesfoys de laisser la Court, puis soudain m'en repentis. Ie proposois ne bouger du logis, incontinent apres falloit trotter. Ie preposois n'al-

ler plus au palais, & le lendemain i'y estois plus matin, qu'à la messe. Je propoisois de ne me ennuier plus, & lors plus fort mes passions augmentoyent. Et par consequent passarent mes saintz desirs: & ne fut mon propos, que penser assez le gierement, & point executer. Voyla comment uiuois de uent, & frivoles imaginations, comme beaulcoup d'autres. Je me suis biē ueu en Court, qu'estant seul ie n'auois aultre plaisir, que de faindre en mon esprit, que ie gouuernois le Roy, les Princes, que i'estois extraict de noble, & antique generation, excellēt en science, gracieux, & aymé de chascun, saige en conseil, moderé au parler, elegant à escrire, prudent en seruice, & agreable à tous. Puis esueillé de ma farce, comme d'ung songe, & regardāt mes piedz, ie cōnoissois aysement, que ie portois faulx tesmoignage de ce doré, & heureux pēser. Et uoyois aux aultres en uerité, & au naturel, ce que i'auois ueu songeāt, en paincture. Je cherchois le moyen d'estre estimé de chascun, saint, docte, humain, content, & de bon zele: & d'aultre part ma uoullunté estoit ung gouffre de malices, & une mer de pensements. Ceste faulte uiēt aux Courtisans,

comme



comme à moy de uouloir ioindre ensemble liberté, & hōneur, qui sont choses incompatibles: pource que desordonnée uolunté est ennemye de uertu. De ma part, lecteur, graces à nostre seigneur, les affections sont amorties aulcunement. Car ie soulois desirer, estant en seruice, que la Court se remuast tous les iours: & maintenant ie n'ay cure de sortir de ma maison. Ie souhaitois ueoir nouueaultés, & à ceste heure, il ne m'en chault. Ie ne pouuois estre sans compaignie: & de present, ie m'ayme solitaire. Ie me soulois delecter d'ouyr, & de ueoir les meschâts, mēteurs, affronteurs: à ceste heure, ce me feroit plus, que mort. Semblablement soulois me récréer à chasser, pescher, iouer à la hacquebutte: maintenant ie ne songe, qu'à regretter le tēps perdu, me souuenāt, que Cēsar me print du couuēt, ou i'auois esté nourry des mon ieune aage, en tresgrande craincte, sans sçauoir, que c'estoit, que du mōde. Mais occupé seulement à mes deuotions, & disciplines, estudiois, me leuois à mynuiēt, consolais les malades, lisois l'Euangile, & aultres liures de bonne doctrine. Brief chascun m'aydoit à estre bon, & me chastioit du mal. Si faisois bien, on le louoit.

louoit. Si mal, on me corrigeoit. Si i'estois triste, on me consoloit. Si colere, on me appaisoit. Si tenté, on prioit Dieu pour moy. O que i'ay bien raison destre plus marry d'auoir obmis le repos de la religion, que ioyeux de la dignite episcopale, en laquelle on me constitua, ueu que en religion est le port de tout bien, & en l'estat episcopal la mer de tout dangier. Voyla comment ie passay mes bons ans, sans employer le temps, & sans congnoistre fortune. I'admoneste le lecteur de faire mieulx, que moy, en Court, s'il y est : ou qu'il la laisse de meilleur heure, que ie n'ay faict. Ce faisant, il monstrera, qu'il a deliberé de uiure en homme saige, & bien aduisé.

L'auteur prend congé du monde,  
avec fort grande eloquence.

## Chapitre

## XX.



Dieu monde, puis, qu'on ne se peult fier de toy, ny en toy, pource, qu'en ta maison, où mode, le passé est passé, le present coule legieremēt, & l'ad-

uenir

uenir commence fort tard, le plus ferme cheoit,  
 le plus royde romp, & le plus perpetuel y def-  
 fault, de sorte, qu'en cent ans destinés au bien l'og  
 uiure de l'homme, à peine, ô monde, nous en lais-  
 ses uiure ung seul. A Dieu monde, puis que tu  
 prends, & ne rends point, fâches sans consoler,  
 desrobes sans restituer, alteres sans pacifier, ac-  
 cuses, sans qu'ayes plaincte, & donnes sentence  
 sans ouyr le droict des parties, iusques à nous  
 tuer, & ensepuelir sans mourir. A Dieu monde,  
 puis qu'en toy, ne par toy n'est ioye sans trou-  
 ble, paix sans discorde, amour sans soupçon, re-  
 pos sans peur, abundance sans faulte, honneur  
 sans macule, richesse sans conscience, ne aussi  
 estat, ou il n'y ait, que plaindre. A Dieu monde,  
 puis qu'en ton palais promettent pour ne le te-  
 nir: seruent, & iamais salaire: inuitēt pour trom-  
 per, trauaillent pour estre en peine: rient pour  
 mordre: aydent pour faire tumber: prestent à  
 rendre incontinent: honnoient pour diffamer:  
 & chastient sans pardonner. A Dieu monde,  
 puis que chés toy abbatēt, ceulx, qui sont en cre-  
 dit: & haulsēt les infâmes, payēt les traistres: &  
 raçônēt les loyaulx, poursuyuēt les pacifique, &  
 fauorisent



fauorisent les mutins, saccagent les paoures, & donnent aux riches, deliurent les malicieux, & condamnent les innocents, dōnent congé aux saiges, & retiennent les fols. Brief on y fait une partie au rebours de ce, qu'on ueult, & rien de ce, qu'on doibt. A Dieu monde, puis qu'en ton palais personne ne se nomme par son nom propre. Car on y appelle le temeraire, uailant: le couard, froid: l'importun, diligent: le triste, pacifique: le prodigue, magnifique: l'auaricieux, mesnagier, le Babillart, eloquent: l'ignare, peu parlant: le dissolu, amoureux: l'honneste, sot: le passionné, Courtisan: le uindicatif, noble. Si bien que nous uends: o monde, l'enuers pour le droict, & le droict pour l'enuers. A Dieu monde, puis que tu trompes tout le monde. Promettant aux ambicieux honneurs, aux desfrans paruenir, mutations, & priuaultés, aux trafficqueurs offices, aux auaricieux thresors, aux gourmāds bāquets, aux ennemys uengeance, aux larrons secret, aux uitieux repos, aux icunes temps, & à chascun faulse assurance. A Dieu monde, puis qu'en ta maison ne se garde fidelité, ne maintient uerité: pource qu, on y ueit les ungs esbaudis, & les aul  
tres

tres estonnés, aultres fâchés, desuoyés, desespérés, pensifz, alterés, effrontés, & tous ioincts en semble plus que perdus. A Dieu mōde, puis qu'en ta cōpaignie, celuy, que plus s'assure, est le plus incertain: celuy, qui te suyt, foruoye: celuy: qui sert, est mal payé: celuy, qui t'ayme, mal traicté: celuy, qui te cōtète, mal cōtêt: & celuy, qui te hāte, est abusé. A Dieu mōde, puis que tu as tel malheur, que riē ne proffitēt les presents, & seruices, qu'on te faict, les mēsonges, qu'on te dist: les banquets, qu'on t'appareille: la fidelité, quon te garde: ne l'amour, qu'on te porte. A Dieu mōde, puis que tu deçois tout, infames tout, chasties tout, menasses tout, acheues tout, & à la fin oublies tout. A Dieu monde, puis qu'en ta compaignie tous lamentent, tous sousspirent, tous se plaignent, tous criēt, tous pleurent, & tous y meurēt en uiuant. A Dieu monde, puis que chés toy on apprend de hayr iusques à tuer, de parler iusques à mētir, d'aymer iusques à desespérer, de māger iusques à uomir, de boyre iusques à s'enyrurer, de traffiquer iusques à desrober, & de pecher iusques à mourir. A Dieu mōde, puis qu'estāt en toy l'enfance passe en oubly, la puericie

en experiēces, la ieunesse en uices, l'aage uirille  
 en affaires, la uieillesse en plainctes, & tout le  
 tēps ensemble en uaines esperāces. A Dieu mōde  
 puis que ton eschole on s'en uà la teste blanche,  
 les yeulx chasteux, les aureilles sourdes, les naril  
 les reumaticques, le front ridé, les pieds gouteux  
 les reins graueleux, l'estomac plein de mauuai=  
 ses humeurs, la teste de micraïne, le corps de  
 douleur, & l'esprit de passions, A Dieu monde,  
 puis que nul de tes supposits ne ueult estre bō, tes  
 moing ce, que chascun iour on ueoit marquer  
 faulsaïres, pēdre larrōs, decoller homicides, met  
 tre sur la roue brigās, brusler bougres, boullir  
 faulx monnoieurs, tenailler parricides, & faire  
 aultres diuerses executiōs de iustice. A Dieu mō  
 de, puis que tes seruiteurs n'ont aultre passetēps  
 que trotter par les rues, se mocquer de quelcun,  
 requerir dames, enuoyer presents, trāper ieunes  
 filles, escripre lettres amoureuses, parler aux  
 macquerelles, iouer aux dés, plaider contre leur  
 uoisin, cōpter nouuelles, inuenter mensonges, &  
 songer nouueaux uices. A Dieu mōde, puis qu'en  
 ton palais nul ne ueult bien aultre. Car l'Ours ba  
 taille cōtre le Lyon, le Rinoceront cōtre le Coco  
 drille



drille. l'Aigle contre le Vultour, l'Elephant cōtre le Minotaure, le Sacre cōtre le Mylan, l'Ours cōtre le Thaireau, l'hōme cōtre l'hōme, & tous ensemble cōtre la mort. A Dieu mōde, puis que tu n'as chose, qui ne soit à nostre ruine: pource que la terre se ouure deuant noz pieds, l'eau nous noye, le feu nous brusle, l'air nous est intēperé, l'hyuer nous refroidit, l'este nous eschauffe, les chiens nous mordēt, les chats nous gratignēt, les araignes nous empoisonnent, les mousches nous picquent, les pulces nous mōgēt, & sur tout, les affaires nous deuorēt. A Dieu mōde, puis que par ta terre personne ne peult aller en seurté, Car à chascū pas se trouuēt pierres, qui nous font trefbucher: ponts, qui tōbent: neyges qui nous empeschēt: mōtaignes, qui nous lassent: tōnoirres, qui nous espouētēt: larrōs, qui nous destroussent: rencōtres, qui nous nuyset, & deffortunes, qui nous font mourir, A Dieu mōde, puis qu'en ton pays n'y a gueres de sains. Pource que les ungs sont la dres, aultres on la uerolle, aultres le chācre, aultres la goutte, autres la teigne, aulcū ciaticque, aultres la pierre, aulcū fiebures lentes, erratiques, tierces, quartes, autres spasmes, paralyses:

Et la plus part sont malades de belle fine folie. A Dieu monde, puis qu'il n'est hōme en ta maison, qui ne soit noté d'aulcū deffault en sa personne. Car si quelcun est de taille haulte, il est uoulté. S'il a beau uisaige, les yeulx serōt trop noirs: si bean front, il sera ridé: si belle bouche, esdenté: si belles mains, mauuais cheueulx: si rouffseau mauuaise peau. A Dieu monde, puis que la uoulté de tes domesticques est tāt differente, que si l'ung ueult suyure la Court, l'autre uouldra nauiger sur mer. Si l'ung ueult estre marchāt, l'autre labourer la terre: si l'ung ayme chasser, l'autre pescher: Et si l'ung gouuerne la monarchie, l'autre soubzcouverture de ce pille le menu peuple. A Dieu mōde, puis qu'en ta maison ne sōt les hommes cōformes au uiure, Et moins au mourir, ueu que les ungs meurēt ieunes, les aultres en la fleur de leur aage, les aultres uieulx, aulcuns meurēt pēdus, aultres noyēs, aultres meurēt de faim, les aultres en mēgeāt, dormāt, ou reposāt, aultres au despourueu: Et le plus souuent sans y penser. A Dieu mōde, puis que chēs toy on ne cōgnoist ny condition, ny cōuersation. Car si l'ung est fol, l'autre est saige: si l'ung est subtil, l'autre est grossier

grosſier: ſi l'ung courageux, l'autre couard: ſi l'ung paſſible, l'autre mutin: & ſi l'ung de bon eſprit, & ſçauant, l'autre eſt ſol & ignare iuſques au bout, A Dieu monde, puis qu'il n'eſt, qui avec toy puiſſe uiure. Car ſi on māge trop peu, on eſt debile, ſi trop, malade: ſi on chemine, on ſe laſſe: ſi on eſt oyſif, on ſ'abestit: ſi on dōne peu on eſt appellē chiche, ſi beaucoup, prodigue: ſi on uiſite ſes amys ſouuent, on eſt notē d'eſtre importun: ſi tard, de preſumption: ſi on ſouffre iniures, on eſt appellē puſillanime: ſi on ſ'en uenge temeraire: ſi on a amys, on eſt priſē: ſi ennemys, pourſuyuy, ſi on demeure touſiours en ung lieu, on ſe faſche: & ſi on change, on ſe plaist. Finalement ie dy, que ce, qui deſſplaist, on me le faiſt prendre, & ce que plus l'ayme, ne puis auoir. O monde immūde, le mondain te cōiure mōde, ie te prie monde, & proteſte cōtre toy mōde, que iamais tu n'ayes part en moy, puis que ie ne demāde aucune choſe de toy, ne ueulx rien eſperer de toy. Car ma determination eſt telle, que,  
Poſui finem curis, Spes, & Fortuna, valete.

Diuiſe de l'Auth eur.



## TABLE DES CHA=9

pitres, & matieres contenues  
en ce Liure.

Qu'aucun Courtisan ne se peult plaindre, sinon  
de soy mesme. Chapitre I.

Que nul ne doit conseiller à aultruy, qu'il aille  
en Court: ou despuis qu'il y est, qu'il s'en  
parte. Mais q̄ chascū eslise l'estat, que mieulx  
il aymera. Chapitre II.

Que le Courtisan ne doit laisser la Court, pour  
y estre sans faueur: mais sur l'intentiō, qu'estāt  
hors de là, il sera plus uertueux Chap. III.

De la uie, que doit mener le Courtisan, depuis  
qu'il aura laissé la Court. Chap. IIII,

Que la uie Rustique est plus tranquille, & pri  
uilegiée, que celle de la Court. Chapi. V.

Qu'au Village semblent les iours plus longs,  
l'aër y est meilleur, & les maisons plus aisées.  
Chapitre VI.

Que les Villageois sont plus heureux commu  
nement, que les Courtisants. Chap. VII.

Qu'aux Courts des Princes la coustume, & sty  
le est de parler de Dieu, & uiure selon le mō  
de. Chapitre. VIII.

Qu'a

Qu'à la Court le nombre est petit de ceulx, qui meliovent: & infyns ceulx, qui s'y perdent.

Chapitre IX.

Que l'homme ne scauroit uiure en Court, sans se passionner de soy, ou d'aultruy. Chap. X.

Qu'à la Court sont bien estimés les Courtisans arrestés, & les dissolus mesprisés. Chap. XI.

Qu'à la Court des Princes tous disent, nous ferons, & nulz, nous faisons. Chap. XII.

Que petit est le nombre des bons en Court, & grands es Republicques. Chap. XIII.

De beaucoup de trauaulx de la Court: & qu'il est de meilleurs Villageois, que Courtisans, Chapitre XIIIII.

Qu'entre Courtisans ne se garde amitié, ny loyauté: & cōbien est la Court pleine de trauail, d'enuie. & rancune. Cha. XV.

De cōbien souloyent estre plus correctes les Rt publiques, & Courts du tēps passé, que celles de maintenant. Cha. XVI.

De beaucoup d'illustres hōmes, qui laissarent les Courts, des grands cités, & se retirarent en leurs maisons plus par uolunte que par necessité. Chapitre XVII.

L'auteur

L'autheur se plaint avec grand raison des ans,  
qu'il a perdus en la Court, Chap. XVIII.

L'Authheur compte les uertus, qu'il perdit en  
Court, & les mauuaïses coustumes, qu'il y ap=  
print. Chapitre. XIX.

L'autheur p. end congé du monde, avec  
fort grande eloquence.

Fin de la table,

~~Amour~~ On les uend a Lyon en rue Merciere  
par Pierre de Tours.  
~~Donc les vers~~  
~~capitales sont a non~~

Meisme non cuer u'euert en vne dame.

A bré adme don me vient ceste flamme.

Respondes moy cest ce point de vous soeur.

Le cest ainsi cest de vous ren sups seur.

Et qui ma traict en ceste dame tout

Graces cent mil pameles tout alentour.

Le mesbages ain si naïf ouuraie

Seul tendissant en beaulté sous parave.

Amour est bien le debiteur de nature

Recepuant fleur de ta oente facture

De laquelle tous ceintus frans gent.

En te voyant deurement emueux







